

**NINTH MIZORAM LEGISLATIVE ASSEMBLY  
(SECOND SESSION CUM BUDGET SESSION)**

**LIST OF BUSINESS**

FOR NINTH SITTING ON MONDAY, THE 4<sup>th</sup> MARCH, 2024  
(Time 10:30 A.M to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.
  
2. **ELECTION TO FINANCIAL COMMITTEES** to elect Members of the four Financial Committees.

**FINANCIAL BUSINESS**

3. **GENERAL DISCUSSION** on the Budget for the year 2024-2025  
*(to commence)*

VANLALTHANTLINGI  
Commissioner & Secretary

\*\*\*\*\*

**HON. SPEAKER** : *Sipai hote Lalpa chuan heti hian a ti a ni: Ka kawngte zawh zela, ka thu tukte I tih chuan, Ka in chung ro I rel ang a, ka rorel hmunte chu I vawng baw ang a, Heng dinghote zingah hian tel ve theihna tur ka pe ang che.*

- Zakaria :7

Aw le, vawiinah kan zingah heng Member zahawm tak tak te - Pu Lalthansanga, damlohna vangin leh, Pu C. Ngunlianchnaga, Lawngtlai 'W' Bialtu rokhawlhna vangin kan zingah an awm thei dawn lo a ni tih House kan hriattir e.

**QUESTIONS & ANSWERS:**

**HON. SPEAKER** : *Starred Question No. 121 zawt turin, Pu Ginzalala, member zahawmtak, Champhai North Bialtu ilo sawm ang.*

*Starred Question No. 121 - Revenue Deptt. hnuaia survey hna outsource chungchang.*

**PU H. GINZALALA** : Ka zawhna, Hon. Minister Land Revenue & Settlement Department min chhan atan –

*“Revenue Department hnuaia surveying hna hi Mizo thalai Entrepreneur-te kutah outsource tura hmalak mai hi a tha em?”* tih a ni e. Pu Speaker, ka lawm e.

**HON. SPEAKER** : Chhang turin, Land Revenue & Settlement Department changtu Minister Pu B. Lalchhanzova ilo sawm ang.

**PU B. LALCHHANZOVA, HON. MINISTER:** Pu Speaker, ka lawm e. He House zahawm taka Member Pu H. Ginzalala zawhna chhanna chu hetiang hi a ni e. –

Tun dinhmuna kan indaih loh dan ngaihtuah chuan kan hna thenkhat hi outsource mai pawh a tul awm e. Chutiang tur chuan survey firm empanelment buaipui mek a ni.

**HON. SPEAKER** : *Zawhbelhna - Zawhna neitu Pu H. Ginzalala, Champhai North Bialtu.*

**PU H. GINZALALA** : Pu Speaker, ka lawm e. Hon. Minister min chhanna kha a lawmawm ka ti khawp mai a. Minister efficient deuh a niin ka hria a, a lawmawm ka ti a. A department chanah hianin transformation hi a thleng dawn niin ka hria a, lawmthu kan sawi ni sela.

Khatia surveying hna kan outsource dawn a nih chuan, a ropui khawpin ka hria a, a lawmawm ka ti a. Amaherawhchu, nakin zelah kan han kal chho ang a, sawrkarin

‘Rules’ te pawh an siam chho zel turah ngai ila, secrecy te pawh an rawn maintain chhoh viau pawh a ngai maithei a.

Tin, thuneihna pe tur an ni a, khatah khanin an power te pawh misuse theihna lai te pawh a awm maithei a. Khatiang kha lo awm palh ta se, engtin nge sawrkar hian a ven thawn dane kan nei ang em?

A dawt leh ah chuan, kan khawpui Aizawl te pawh hi a ni ang a, Lunglei te pawh a ni vek tho ang a, hma kan sawn ve zel a; khawpui hian hma a sawn a. Amaherawhchu a hmasawn dan hi, mi thiamte chuanin, ‘*unplanned growth*’ an ti a, plan awm lem lova hmasawna a ni pakhat a. Hetah hianin Revenue Department hian mawhpurhna sang tak a nei awm mang e aw, ka ti a. Surveying te khatiang kan outsource dawn a nih phei chuan, kan Aizawl khawpui te pawh hi expansion scheme kan neih a ngai ang a; UD&PA hnuai ah City Development Plan te pawh a awmin ka hria a. Hengte nena convergence-a kalpui a, kawngpui awm dan tur te, side drain awm dan tur te leh engkim mai kan land-use pattern hi revolutionalise a ngai khawpin ka hria a. Pu Speaker, hetiang zawng hian hma lak theih dan awm chho zel sela a duhawm khawp mai a. Ka zawhna pawh – “khatiang deuh khan a theih chin chin hmalak theih dan a awm ang em?” tih hi ni rawh se. Ka lawm e.

**HON. SPEAKER** : A lawmawm e. Khawngaihin hei, zawhna tam deuh, 20 dawn han inzawh te a awm a, department leh thil dang ram tana pawimawh si zawhna hun tam tak kha a titawi a. Chuvangin, zau zawka hun kan neih theih nan, tawi deuha zawh ni thei se tih ngenna a ring khawp mai a, House chhung leh House pawn atang pawhin. Chuvangin, member ten a theih hram chuan supplementary question, in zawhbelhna kha pahnih-khat ti thei hram sela. Tin, kan zawhin hun kha hmang thiam deuh hlek ta ila; a tul dan a zirin pathum thleng te pawh lo ni pawh ni ta sela. Chutiang chuan, hun tam zawk ram rawngbawl na kan ngaihpawimawh te kan sawi theihna turin, midang tan hun kan kianah te pawh ngai ta ila, a tha ang e.

Tichuan *Zawhbelhna* dang – Pu W. Chhuanawma, Tuichang Bialtu ilo sawm ang.

**PU W. CHHUANAWMA** : Pu Speaker, ka lawm e. Hei Surveyor indaihlohna hi a nasa ngang a nih ka ring a. Kan bial Tuichang-ah khian Khawzawl te, Khawhai te pawh khaw lian tak, notified town te an ni tawh a, khing zawng zawngah khian a zatve aia tam daih khi LSC mumal neilo, revenue pek loh a ni hlawm a, chuvangin, sawrkar hian chhiah a hmuh tur hi a hmu lo nasa em em mai a ni. LSC siam tur hian Champhai atangin mi pahnih-khat surveyor an lo kal a ngai a, an kal lam leh haw lam man te, thingpui man te nena han ngaihtuah chuan, mi-rethei deuh tan chuan khatiang kha phurrit a tling a ni. Chuvangin, sawrkar-a chhun luh hma hauh pawhin ₹8000 - ₹10000/- inkar hi thil chuangtlaiah an chawi ngei ngei thin a ni. Chuvangin, hetia entrepreneur te kuta outsource a nih hma pawh hian mi pahnih-khat tal hi Khawzawl ah hian a dah thei

ang em? A chhan chu, eng department tan pawh building ruak luah tur a tam em em mai a; DC building ruak lianpui mai luah tur pawh a awm a. Chuvangin, manpower chiah mamawh a ni a, a dang zawng chu mamawh chhanna a awm vek a. mi pahnih-khat tal hi outsource a nih hma te hian dah chhoh theih a ni ang em le?

**HON. SPEAKER** : *Zawhblehna* - Pu T. Lalhlimpuia Lunglei West Bialtu.

**PU T. LALHLIMPUA** : Pu Speaker, ka lawm e. Land Revenue & Settlement Department Minister ka zawh belhna chu –

i) Land dispute hi a tam hle mai a, district ah solve loh tam tak a awm a. Hengte hi tun Ministry hnuai department ah hian hmalak tumna awm em? Engtia tih fel tur nge tih ngaihnan te a nei em?

ii) A dawt leh ah chuan, tuna ka hmaa member zahawm tak sawi ang khan, Surveyor-te indaihlonna a vang nge, LSC leh amalgamation siamrem ngai hun rei tak tak inmung a tam em em mai a. Hei hi ka sawi duhna chhan chu, kum 2020 khan Lunglei Venglai Baptist biakin pahnihna tur hi ka buaipui a, chutah chuan LSC pahnih amalgamation turin kan han dil a, mahse waviin thleng hian tihfel hleihtheih a ni lova. A chanchin te pawh kan han zawt a, midang pawhin hetiang problem hi tam tak kan nei a, hengte hi chak zawka hmalak theih dan a awm em? Hmalak awmna a awm em?

**HON. SPEAKER** : *Zawhbelhna* pakhat kan la leh ang a, Leader of Opposition Pu Lalchhandama Ralte, Tuivawl Bialtu ilo sawm ang.

**PU LALCHHANDAMA RALTE, OPP. LEADER:** Pu Speaker, kan Minister zahawm tak, Land Revenue & Settlement changtuin a min chhan atan ka duh chu –

i) Land record fel fai zawk kan neih theihna turin sawrkar kal tawh atang khan nasa takin hma lak a ni a. Tun sawrkar kal mekah hian land record fel fai zawk kan neih chhunzawm zel theihna tur atan hma lakna thar emaw, hmachhawp emaw kan nei em?

ii) Khaw kar kawngah han kal ila, mi huan hman tangkai mang loh zau pui pui tam tak a awm ta a. Mihausate leh mi thenkhat ten ram zau deuh deuh utilize loh tam tak an nei a. Ram, eizawna atana mamawh te tan a awm mumal ta lova. Heng hi tihbo a nih theihna turin, progressive tax kan sawi thin te kha kal pui turin sawrkarin hma a la em?

iii) Chanchinbuah te hian tunhnaiah ualau takin tu tu ten emaw LSC thlawk chi loan lakna atana hman mai mai tur, a ram tak tak awm lo zawrhna hi a lo awm leh zeuh thin a. Hetiang a awm hian sawrkarin a um zuiin, hetiang zuartute chungah hian action a la ngai em?

**HON. SPEAKER** : A zau khawp mai a, a karki khawp mai a. A theih ang anga chhang turin Land Revenue Department changtu Pu B. Lalchhanzova, Minister ilo sawm ang.

**PU B. LALCHHANZOVA, HON. MINISTER:** Pu Speaker, ka lawm e. House zahawm taka Memberte'n he House memberte tan leh ram tana Land Revenue & Settlement Department bika zawhna pawimawh tak tak an zawhte a lawmawm hlein ka hria.

Pu H Ginzalala khan, 'out-sourcing agency te kan hmang a nih chuan fimkhur ngai laite a awm ang' tiin thahnem ngai takin a rawn zawt a. Pu Speaker, wawiina a zawhna rawn luh ni hi a timing khawpin ka hria a. Wawiin hi out-sourcing agency te'n EOI (Expression of Interest) an rawn thehluk tawpni a ni a, Pu Speaker.

Surveyor hi ram pumah post 139 a awm a, chuta post 64 chu hnawhkhah a ni a, 75 hi hnawhkhah loh a ni. Surveyor indaihlohna hi 53% a ni a, indaihlohna hi a sang hle a. Sawrkar chuan khang avang mipui manganna te hriain, out-sourcing agency te rawih chhoh a tum a. Hetah hian uluk taka ruahmannate siam a ni a, EOI-ah te pawh fimkhur taka ziah a ni a. 'Secrecy vawn' tihah hian, outsourcing agency-te khan ram an va teh ang a, hetah department lamah technical expert ten uluk takin an lo thlifim zel dawn a ni, Pu Speaker.

Pu W. Chhuanawma zawhna - Khawzawl bikah khan, Settlement Officer 1; Surveyor-I 1 leh Surveyor 3 an awm mek a. Khangte kha kan member Pu W. Chhuanawma pawh khan a tul angin lo bawhzui sela, a harsatna te pawh kha sawiho zel theih a nih ka ring a ni.

Tin Pu Speaker, Pu W. Chhuanawma zawhna kal zelah khan, Mizoram chhunga ram teh chungchangah kan harsatna hi kawng hnih lian pui puia hmachhawn a ni a. Chungte chu – 'Survey of Villages and Mapping with Improvised Technology in Rural Village' kan tih SVAMITVA project kha a awm a. Chutah chuan rural area mihring chenna si khaw 215 te drone hmanga survey an ni tawh a.

Tin, 'Digital India Land Record Modernization Programme' hnuaiah tunah hian nasa taka kalpui a ni a. Kei ngei pawh Delhi-a ka kal khan Land Resources Secretary te pawh hemi chungchangah hian ka hmu tawh a. Hetiang hmalakna hi ennawn chhoh zel a ni a, ram teh chungchanga kan harsatna pawh hi khan Out-sourcing Agency te nen tangkawpin heng harsatna hi chu kan sukiang chho thei turah kan ngai a ni.

Pu Speaker, Pu T. Lalhlimpuia zawhna - land dispute chungchang hi thil pawimawh deuh mai a ni a. Miin harsatna a tawh chuan Settlement Officer-ah a kal ang a; chuta a la duh khawp loh chuan, Director-ah a kal leh ang a; chuta a la duh khawp lo leh chuan Secretary, Land Revenue & Settlement Department-ah a kal leh ang a; chuta a la duh khawp loh leh a nih chuan, 'court-ah a kal ang' tih kha tuna kan process pangngai hi chu a ni.

Pu Speaker, he thilang hian ram mipuite leh he House zahawm taka Member tena an hriat atana ka duh chu, department-a ka thawhpuite hemi chungchang dispute, rambuai chi hrang hrang harsatna hi ‘engvang nge’ tiin kan han en a. Department-a ka thawhpuite min chhanna pawimawh em em mai a awm a, chu chu - “Ka pu, Land Revenue & Settlement leh mipuite inkar hi a lo kak rei tawh lutuk a, ram buaite hi a buai tih hriat hma pawh khan kum tam tak ngaihtuah lovin a lo awm rei tawh lutuk a. Land Revenue & Settlement administration hi siamthat a ngai nasa lutuk a, kha kha rambuai hi a ti tam a ni. A buai tirah emaw en mumal a awm bawk si lova; chu chu a tawpa kan buaina hi a ni e”, an ti a. Chuvang chuan, Land Revenue Department administration hi Pu Speaker, tha thei ang bera kalpui a nih theih nan tunah hian ngaihtuahna sen mek a ni a. Aizawl District te pawh hi North leh South ah te then ila; directorate te pawh hian an thawh tur ang takin directorate role play sela, vawiina kan harsatna, manganna tam tak hi chu kan tihnep theih hi ka ring a ni.

Pu Speaker, Pu Lalchhandama Ralte, Opposition Leader zawhna – ‘land record fel fai’ han tih laia pawh kha, tuna ka rawn chhan tawh deuh ang khan ‘SVAMITVA’ kan tih, rural area, mihring chenna kan tih ang chi te Digital India Land Record Modernization Programme (DILRMP) hnuaiah te tunah hian en chhoh mek a ni. Ka rawn sawi tawh ang khan, Land Revenue administration hi uluk zawka en chhoh a ni ang a, heng Land Record te pawh hi siam fel chhoh theih beisei a ni.

Tin, Pu Speaker, a zawhna pahnihna - *progressive tax* chungchang a rawn zawhna kha chu, he House-ah hian zawhna lo awm tawh thin amaherawhchu, zawttu tur ten an zawh hmanloh a ni a. Hei hi sawrkarin kal pui tha a ti a, a ngaihtuah mek a ni.

Pu Speaker, ‘LSC thlawk’ han tih te pawh hi ka chhanna hmasa khan a cover thovin ka hria a. Hetia kan din hian ‘sawrkar hmasate an fel lo a ni; an kal thalo a ni’ tih lam kha kan sawi tum ber a ni lova. Mawhphurhna kan lak chin china thil tha lo hi kan mawhphurhna chu a ni hlawm mai a. Administration fel lovin a ken tel vek a ni a, Pu Speaker. Administration mumal tak kan kalpui ang a, hei hi chu kan rawn hmachhawn chho zel ang.

Pu Speaker, Pu H. Ginzalala zawhna ka chhan hmaih deuh awmin ka hria a. Heng city planning, town planning chungchanga kha chu Land Revenue-in a tih theih chin a awm a, a bak city plan leh town plan bika kha chu a ngaihtuah tu tur department ten an ngaihtuah mai turah ka ngai a.

Pu Speaker, a tawp berah chuan, House information atan pawh - tunah hian Mizoram pumpui District Council tel lovin ‘pass’ kan tih - LSC te, house pass te, WRC leh periodic patta kan tih zawng zawng kha record ah chuan 2,72,028 a awm mek a ni. Ka lawm e.

**HON. SPEAKER** : *Starred Question No. 122* zawt turin Thorang bialtu member zahawm tak Pu R. Rohmingliana ilo sawm ang.

*Starred Question No. 122 - Biometric Attendance System chungchang.*

**PU R. ROHMINGLIANA:** Pu Speaker, ka lawm e. GAD Minister zahawm tak chhan atan, *Starred Question No. 122* –  
Biometric Attendance System te hi Sawrkar office hrang hrangah hman zel tumna a awm em?

**HON. SPEAKER** : Chhang turin General Administration Department changtu Chief Minister, Pu Lalduhoma ilo sawm ang.

**PU LALDUHOMA, HON. CHIEF MINISTER:** Pu Speaker, *Starred Question No. 122* chhanna chu –  
General Administration Department, Secretariat Wing chuan Biometric Attendance System hi Mizoram Secretariat-a sorkar-hnathawk zawng zawngte hman turin hma a la mek a, he hmalakna hi a hmawr bawkna (final stages) thlen chhoh mek a ni e. Department hrang hrang, district level thlengin Biometric Attendance hi la hman chhoh zel tura ruahman a ni bawk.

**HON. SPEAKER** : *Zawhbelhna - Zawhna* neitu, Pu R. Rohmingliana.

**PU R. ROHMINGLIANA:** Pu Speaker, ka zawhbelhna chu – Tuna hman tawh chinah hian office kal te ah, hman hma aiin danglamna a awm em? A awm a nih chuan, eng danglamnate nge awm?

**HON. SPEAKER** : *Zawhbelhna - Dr. Lorrain Lalpeklia*na Chinzah.

**DR. LORRAIN LALPEKLIANA CHINZAH:** Pu Speaker, Hon. Chief Minister min chhan atan - Biometric Attendance System ni lo, attendance lakna tur dang kalpui tum a ni em?

**HON. SPEAKER** : Aw le, chhang turin GAD changtu Chief Minister Pu Lalduhoma i lo sawm ang.

**PU LALDUHOMA, HON. CHIEF MINISTER:** Pu Speaker, hemi hman hma leh hman hnuah hi chuan a danglam teh meuh a; attendance kha zuk monitor theih a nih tak avangin, chumi avanga introduce a ni a. Tin, ‘a dang a awm em’ tih kha - biometric attendance system hi a hautak a, sum sen a sang a. Chuvangin, department thenkhat chuan sum sen vak ngai lo chi te an lo ngaihtuah chhuak a, a that tho avangin kha kha kan pawm tho a ni. *Entirnan:* Education Department-ah te chuan KAI an hmang a, QR

code an hmang a, heath hian sum sen a awm vak lo. Chu chu a school premises-ah geo-fencing in an ti a, fel takin. Khami geo-fencing chhunga awm tan lo kha chuan attendance a pek theih loh a ni; a pawn atang khan tih ngaihna a awm lova, a tha em em a. Tin, a application hi Google playstore ah dah luh a ni tawh a, dashboard atangin Minister te, Secretary te khan zirtirtute leh an staff-te attendance kha awmhmun atangin an hmu vek thei tawh a. Hei hi department dangte pawhin hetiang a tlawm zawk, tha tho si an lo develop thei a nih chuan, pawm a ni vek tho a ni.

**HON. SPEAKER :** *Starred Question No. 123* ah kan kal ang. A tira House hriattir a nih ang khan, Zawnha neitu Pu C. Ngunlianchunga, Lawngtlai West bialtu hi vawiinah rokhawlhna avangin kan zingah a awm thei lova. Dan ang thlapin ziakin a aia zawnha zawt turin Siaha bialtu Dr. K. Beichhua a authorize a. Tunah zawnha zawt turin Dr. K. Beichhua ilo sawm ang u.

*Starred Question No. 123 - NHIDCL - Forest Clearance chungchang.*

**DR. K. BEICHHUA :** Pu Speaker, ka lawm e. Environment, Forests & Climate Change Department changtu Minister hnen a Pu C. Ngunlianchunga, MLA zahawm tak aia ka zawnha chu –

National Highways and Infrastructure Development Corporation (NHIDCL) te hi Forest Clearance dil lova hnathawh tir tumna a awm em? tih hi ka zawnha a ni e.

**HON. SPEAKER :** Pu Lalthansanga hi damlohna avangin damdawi inah a awm a; a awm loh takah chuan Home Minister Pu K. Sapdanga hnenah authorization a lo pek tawh angin, Pu K. Sapdanga, Minister zahawm tak chhang turin ilo sawm ang u.

**PU K. SAPDANGA, HON. MINISTER:** Pu Speaker, hriat sual palh a awm a ni maithei a; Pu Lalthansanga, Minister hian a aiawha zawnha chhang tur hian Pu C. Lalsawivunga a ruat zawk niin kan va hre em.

**HON. SPEAKER :** Ka hresual a ni maw. Ka lo hresual anih chuan, khawngaihmin min ngaidam ula. Pu C. Lalsawivunga zawk a ni awm e; Zawnha chhang turin ilo sawm ang.

**PU C. LALSAWIVUNGA, HON. MINISTER:** Pu Speaker, ka lawm e. Lawngtlai West Bialtu zahawm tak Pu C. Ngunlianchunga zawnha chhanna chu –

“NHIDCL-in forest clearance phalna dil lova hnathawh tir tumna a awm lo” tih a ni e.



**HON. SPEAKER** : Aw le, a concern minister hi, sawi tak ang khan kan zingah a awm loh avangin, zawhbelhna kan la lo mai ang a, *Starred Question No. 124* ah kan kal anga, Tuirial Bialtu Member zahawmtak Pu K. Laldawngliana ilo sawm ang.

*Starred Question No. 124 - Mizoram-a rawn raltlante Sawrkarin enkawl zui a tum dan chungchang.*

**PU K. LALDAWNGLIANA:** Pu Speaker, Home Department changtu Minister zahawm tak chhan atan *Starred Question No. 124* chu –

“Mizoram sawrkarin Burma, Bangladesh, Manipur atanga kan unau rawn raltlan mekte enkawl chhunzawm a tum dan min hrilh thei em?”

tih a ni.

**HON. SPEAKER** : Chhang turin, Home Department changtu Minister zahawm tak Pu K. Sapdanga ilo sawm ang.

**PU K. SAPDANGA, HON. MINISTER:** Pu Speaker, Tuirial Bialtu Pu K. Laldawngliana zawhna chhanna chu hei hi a ni –

Mizoram sawrkar chuan Myanmar, Bangladesh leh Manipur atanga kan unaute sahimna zawnga Mizoram-a lo raltlan mekte hi a theih ang anga chhawmdawl chhunzawm zel a tum a ni.

**HON. SPEAKER** : *Zawhbelhna - Zawhna neitu*, Pu K. Laldawngliana, Tuirial Bialtu.

**PU K. LALDAWNGLIANA:** Pu Speaker, ka zawhbelhna chu –

- i) Tun dinhmunah hian Mizoram-ah raltlan engzat nge la awm?
- ii) Central sawrkar atangin raltlan tanpuina engzat nge hmuh a nih tawh?

**HON. SPEAKER** : *Zawhbelhna - Pu Rasik Mohan Chakma*, Tuichawng bialtu.

**PU RASIK MOHAN CHAKMA:** Pu Speaker, ka zawh belhna chu –

- i) Women Police hi Mizoram Police station tinah dah tumna a awm em? Hei hi ka zawhna chhan chu – Chawngte-ah hian hmeichhe police awm loh avangin harsatna tam tak a awm thin a, hmun dangah pawh a awm tho ka ring a. Hetiang dah theihna kawng hi a awm em le?
- ii) Tin, Fire Service Station hi Chawngte-a hawn theih dan a awm em?

Chawngte khu khawpui a ni tawh a, density of population kha a tam a, in kang te a awm chuan, a khaw buaiin kan buai thei a ni. Chuvangin, tun thlenga Fire Service Station a la awm lo hi a tha lo em mai a, a rang lama dah theih dan a awm em?

**HON. SPEAKER** : *Zawhbelhna* - Lalrinsanga Ralte, Serlui Bialtu.

**PU LALRINSANGA RALTE:** Pu Speaker, kan Home Minister chhan atana ka zawh belhna chu - tunhnai hian dan lo anga kuhva tawlh ruk a nasa leh khawp mai a. Kuhva hi Pu Speaker, tlem han sawi zau ka duh chu, ka bial lam khu kuhva hmunpui a ni a, kuhva reng reng hi a hma kum atangin hralh lawk thin a ni a. A par atang hian kum dangah chuan a lei tu tur ten an rawn lei a, an rawn veng zui thin a ni. Nikum lam pawh khan harsatna kan tawh a, amaherawhchu, vanneihthlak takin a hralhna ah kan buai lutuk ta lem lova. Tun kum a kuhva thar lei tur hian vai leh hnamdang hote hian an rawn buaipui ta lova, tunah hian ka bial chhung Bilkhawthlir-a kuhva ching association ten kuhva dan lova tawlh ruk nasa lutuk veng turin duty an tum ta a. Hei hi sawrkarin engtin nge hma min lakpui ang? Tun aia khauh leh zualin sawrkarin hei hi a veng thei ang em? Kuhva hralh hun a ni tawh a, kuhva hmunpui kan nihna angin heng kan hralh theihna tur hian sawrkarin ruahmanna min siampui thei ang em?

**HON. SPEAKER** : *Zawhbelhna* - Pu V.L. Zaithanzama, Aizawl West-III Bialtu.

**PU VL. ZAITHANZAMA:** Pu Speaker, Home Minister changtu Minister zahawm tak chhan a tana ka zawhbelhna chu –

- i) Police promotion exam pencil hmanga mark an pe thin tih hi a dik em? A dik chuan, eng vanga pencil hmang kher nge an nih?
- ii) Ramri chungchang hi sawrkarin eng angin nge a lo bawhzui thin?

**HON. SPEAKER** : *Zawhbelhna* - Lt. Col. Clement Lalhmingthanga, Champhai South bialtu.

**LT. COL. CLEMENT LALHMINGTHANGA:** Pu Speaker, ka zawhna tur hi tlema sawifiah deuh a ngai a.

Ka bial chhung Zokhawthar leh a chhehvela Mizo chengte khian eizawna pangngai nei turin leilung leh ram an nei vak lo a ni. Eizawna atana an inngahna ber chu Tiau sumdawnaah khian a ni mai a. Tunah khilai kan inrina dan chah/control a ni tawh a, chuvangin, an nitin eizawna khi, sawrkar danah chuan international border te a lo nih a vangin dan kalhna eng emaw chen a awm a. Chuti chung chung erawh chuan khi bak inngahna leh eizawna an nei si lova.

Khimi Tiau Lui kal tlanga gate rawn kal khian sangha tin, soft-drink a tanga bawngsa, zawngtah leh antam te thlengin khi ta tanga rawn kalin Aizawl Bazar a rawn thleng a; chu bakah, insakna bungrua te, sport bungrua te a rawn kal lut bawh a. Tin, Silchar lam atanga rawn kal ai hian a then pheih chu a lo tlawm zawk bawh a. Khi lai eizawna ah

khian ka bialte tana an eizawna bulpui ber, chhungkaw tam tak innghahna ber khi engti kawngin emaw siam remsak dan a awm em?

**HON. SPEAKER** : Zawhnate a karkik zau viau mai a, Burma border Zokhawthar Tiau atanga Tripura leh Assam border, Hachhek lam inkar kha a ni a. Kan Home Minister Pu K. Sapdanga a theih ang ang chhang turin i lo sawm ang ule.

**PU K. SAPDANGA, HON. MINISTER:** Pu Speaker, ka lawm e. Zawhna neitu Tuirual bialtu Pu K. Laldawngliana zawhbelhna, ‘Raltlan zat hi engzah nge’ tih kha; (‘raltlan’ kan ti leh thin a, hei hi himna zawnga lo tlanchhiate an ni a, refugee pawh an ni chiah lova.) an zat hi sawifiah thiam a har khawp mai a. Chhiar dan hnukung ber, February Ni 9 a kan chhiarnaah chuan Manipur a tangin 9248 an ni a, a hnu ah hian lut chhuak thahnem tak an awm leh tawh ang a; chuvangin, vawiina figure nen chuan a inang hlei thei lova, nitin chhiar thu a awm bawk si lova. Myanmar atangin tun February ni 3 a kan chhiarnaah chuan, 32161 an ni a; mahse hei pawh hi chhiar hnu ah hian sawi tawh ang thovin figure a danglam thei viau awm e. Tin, Bangladesh a tanga lo lut te hi January ni 25 a chhiarna ah chuan 1167 an ni a. Vawiina zawhna, vawiina chhanna diktak erawh hi chu a tihngaihna a awm lova, mberte’n min hriatthiam-pui ka beisei a ni.

Tin, ‘tanpuina dawn tawh engzat nge’ tih hi, hun hmasa lamah khan chhan tawh a niin ka hria a. Sawrkar-laipui atanga raltlante tanpuina pawisa faia dawn hi sawrkar hun hmasa lamah khan 30 lakhs a ni a, a hman dan erawh chu chhinchhiah a ni lem lova, record ah a awm lo a ni.

Tin, Chawngte Bialtu Pu RM Chakma zawhna kha; hmeichhe police hi kan indaihlo viau mai a, mamawh zat han lak belh turin sum a awm bawk si lova, department pawh kan buai em em a. Lo dawh hram hram sela, theihtawpin sawrkar tharin inrenchem a buaipui ang a, sum te a awm theih hunah chuan hmeichhe police te an mamawhna hmuna an awm kim theihna turin semdarh tum a ni e.

Tin, Chawngte-a ‘fire sub-station emaw tal awm se’ tih kha, Home Department pawhin a duh em em a. Amaherawhchu, sawi leh sawihnu tunah chuan recruitment tih belh a remchang lova, sum leh pai awm lova hnathawktu lak ngawt thu a awm si lova. Chuvangin, hei pawh hi lo nghak hram hram se la, sawrkarin theih tawp a chhuah mek zel a; tih theih hun te chu a la awm mial mahna.

Tin, Serlui Bialtu Pu Lalrinsanga zawhna kha – a lang pawhin, a ruk pawhin sorkarin a buaipui nasa em em a, sawrkar ai mahin mipuite hian kan buaipui zawk a. Kan inthural tlang viau ni pawh hian a lang a, tunah hian a chep sawt ta riau mai a. Amaherawhchu, hun hmasa lama kan tarlan ang khan, khawi khawiah emaw hian chhek khawl awm ni te hian a hriat a; engtik hunlaia chhekkhawl nge a nih; zalen hun awm lai te kha a lo ni

teh reng emaw ni. Sorkar thar a pian hnuah hi chuan, police check gate reng rengah, ‘foreign kuhva a kaltlang tur a ni lo’ tih thupek a awm a, chu chu kan police-te pawhin an zawm tha hle ni te pawhin kan hria a; duty lohna hmunah erawh chuan ‘kawng ruk a awm zung zung e’ an ti a. Chuvang chuan kuhva hi a rem hleitheh lova, a veivak pawh hi a tawp hleitheh lova. A changin, khawtlangin an lo man a, a changin, police ten an lo man a; kan kawl a thiang bawk si lova foreign bungrua anih miau si avangin. Foreign kuhva lokal hi lu tihai tham buaipui tur hi ala awm reng a ni.

Tunah hian Mizoram chhungah kuhva chinga eizawng hi chhungkua singkhat chuang lai an awm a, chungho te nen chuan remruat dan te kan ngaihtuah mek zel a. Engpawh nise, Mizoram chhunga kut-hnathawktute’n harsatna an tawh loh theih dan ang bera, a remchang ang anga buaipui mek a ni. Chubak chu sawi thiam a har khawp mai. Ruling a ni emaw, Opposition a ni emaw, kut-hnathawktu kan ni emaw, sawrkar-hnathawk kan ni emaw a ram pum hi kan tan tlan a ngai tak zet zet a ni. Hemi chungchangah hi chuan, ramchhunga kan thlai thar hralhna tikhawlo thei a nih miau avangin, theihtawp chhuahpui turin member zahawm takte kan zavaiin ka sawm tak meuh meuh bawk a ni.

Tichuan, Aizawl West III Bialtu, Member Pu Zaithanzama zawhna - Police promotional exama ‘pencil marking’ tih chungchang kha, hmanni lawkah Police Association Conference ah an Association Secretary te report kan ngaihtlakah chuan, “Police exam-a mark pekna ah hian pencil hman thin a ni a, association hian hmang tawh lo turin ngenna kan siam a. Chuvangin, tun police exam hnuhnung berah kha chuan ball pen ngeia mark pek a ni ta e,” ti kha report an pek dan chu a ni e.

Tin, ramri chungchangah ‘engtin nge sawrkarin a lo bawhzui tawh’ tih chhanna hi a thui deuh hlek a, Pu Speaker; a kimchangin ka sawi mai dawn em ni ang? (**Hon. Speaker:** A zawttu hnenah khan ziakin pe ta mai la, kan lungawi mai em?) A zawttute an lungawi ang em, ka hre lova; hriat theih chinah chuan, District Council hun lai atanga vawiin thlengin vawi 24 ramri chungchang hi sawi a ni tawh a ni. A changin Delhi-ah, a changin Guwahati ah, a changin Aizawl ah a ni a, chung inbiakna zawng zawng chu House-in a hriat duh chuan, a kimchangin kan hrih thei ang a, a hmun leh a inbiaa te a sawi theih a. Engtiang taka inbia nge an nih, tih erawh chu sawrkarin a vawn ruk a nih avangin, House-ah sawi a rem chiah awm lo mang e. A tawh thei mai em aw?

**HON. SPEAKER** : Aw; a lawmawm e. Tunah *Starred Question No. 125* naah kan kal ang a. Heipawh hi Home Department concern tho a ni a, zawt turin Aizawl South III bialtu zahawm tak Pi Baryl VanneihSangi i lo sawm ang.

*Starred Question No. 125 - Silai License pekchhuah chungchang.*

**PI BARYL VANNEIHSANGI:** Pu Speaker, Home Department changtu Minister ka zawhna, *Starred Question 125* chu –

- a) Sawrkar thar din a nih hnuah silai license engzat nge pekchhuah tawh a nih?
- b) Pekchhuah a awm chuan, mi engzat hnenah nge pek a nih?

**HON. SPEAKER** : Chhang turin Home Department changtu Minister Pu K. Sapdanga ilo sawm ang.

**PU K. SAPDANGA, HON. MINISTER:** Pu Speaker, Aizawl South III Bialtu, Member Pi Baryl Vanneihsang (official-in, ‘Pi’ tih a ngai si a) nula zawhna chhanna chu –

- a) Sawrkar thar din a nih hnuah Home Department-in Silai license approve-a, a pek a la nei lo.
- b) A hmasaa chhanna hian a tichiang chiang nghal awm e.

**HON. SPEAKER** : *Zawhbelhna* - Zawhna neitu, Pi Baryl Vanneihsang, Aizawl South-III Bialtu.

**PI BARYL VANNEIHSANGI:** Pu Speaker, tuna kan ngaihthlak ang khan, ‘approve-a pekchhuah a la awm lo’ tih a ni a. Ka zawhbelhna chu –

- i) “Pekchhuah loh chhan hi khawngaihmin min hrilh thei em?” tih leh;
- ii) “Pek leh tumna a awm em?” tihte a ni e.

**HON. SPEAKER** : *Zawhbelhna* - Pu Lalramliana Papua, Lunglei South Bialtu.

**PU LALRAMLIANA PAPUA:** Home Minister-in a chhan atan a ka zawhbelhna chu –

- i) Sawrkar kalta hunlaia ramri buai leh Covid laia police duty-te TA kha pek fel a ni tawh em?
- ii) Lunglei South Biala Hrangchalkawn Police Outpost hi, kawng laih avanga a chhiat hnuah compensate te pawh a ni a, tun thlenga hmalakna la awm lo hi, enzui tumna a awm em?
- iii) Sak thar leh tum a ni em? Ka lawm e.

**HON. SPEAKER** : Aw le, chhang turin Home Department changtu Minister Pu K. Sapdanga ilo sawm ang.

**PU K. SAPDANGA, HON. MINISTER:** Pu Speaker, zawhbelhna zawttute hi a tawng rang chi ve ve an ni a, an sawi zung zung mai a. Tlar khat pawh ka lo chhinchiah hmain an sawi zo vek hman zel mai si a; a buaithlak khawp mai.

Zawhna neitu Pi Baryl Vanneihsang zawhbelhna – ‘pek loh chhan’ tih kha; hei, kan hriat angin sawrkar thar hi license chungchanga a mawhphurtu hi thla 3 pumhlum emaw

chauh a la ni a. Silai te chu (kan hria a) ralthuam a ni a, license uluk taka pek ngai chi a ni a. Chuvangin, mi hriatchian mang loh hnena silai license han pek ngawt te kha a la hun lo deuh e, tiin, nghahkhawm ve deuh a ni a. Chu chu a chhan pakhatna a ni.

A pahnihnaah chuan, kum hmasa lam khan silai license hi kan lo phalrai deuh a. Chhinchhiahnaa a lan dan chuan, kum kaltaah khan silai license hi 1296 pek chhuah a ni a, a hmasa leh khan 1053 pek chhuah a ni bawk a. Chung silai license-te chu sawrkarin a hriat danin, silai lei mang lova a license zawrh kual te a awm niin report dawn a ni a; chutih laia silai license han pek belh zung zung kha a fel lo e; tlema chinfel phawt a ngai a nih hi. Tuna silai license leng darh vel sumdawna ang hiala hman hi, a sawi uar deuh pheih chuan, ‘vote zawn lai khan silai license hi kan phalrai deuh a ni’ tih thawm te a awm a. Chuvangin, tunah hian silai license awm mek hoa hi han thlithlai fel phawt ni sela, chumi hnuah chuan pek belh dan te chu ngaihtuah a ngai.

Hetih lai hian, mi-thenkhat mamawh tak tak, mahni invenna atan te, tin, lo neitu thenkhatin an huan thlai venna atan te silai an mamawh em em a, chungte chu dan ngawt tum a ni chuang lova. Chuvangin, an mamawh dan a zirin la pek zel tum a ni e.

**HON. SPEAKER** : Aw le, a lawmawm e. *Starred Question No. 126* naah kan kal a, zawt turin Serlui bialtu zahawm tak Pu Lalrinsanga Ralte i lo sawm ang

*Starred Question No. 126 - Lengpui Airport Chungchang.*

**PU LALRINSANGA RALTE:** Pu Speaker, GAD changtu Minister ka zawhna chu –

“Mizoram sawrkarin Lengpui Airport hi bungrua phur service theihna tura siam tumna a nei em?” tih a ni e.

**HON. SPEAKER** : Chhang turin, GAD changtu, Chief Minister Pu Lalduhoma i lo sawm ang.

**PU LALDUHOMA, HON. CHIEF MINISTER:** Pu Speaker, ka chhanna chu –

“Sawrkar tharah hi chuan a hranpaa ruahmanan a la awm rih lova; enzui chhoh vat tum a ni.” tih a ni e.

**HON. SPEAKER** : *Zawhbelhna - Zawhna neitu, Pu Lalrinsanga Ralte.*

**PU LALRINSANGA RALTE:** Pu Speaker, ka zawhbelhna chu hengte hi an ni e –

i) Lengpui Airport hi Airport Authority of India (AAI) ah hlan tumna a awm em? Hlan tumna awm ta se eng chen nge ruahmanan kalpui a nih tawh?

ii) ZPM sawrkarin, a sawrkar huna a tih ngei ngei tura a puan SDRP - chapter 4 (L) ah hian, “Lengpui Airport hi bungraw phur service theia siam tum a ni ang” tih a ni a.

Kan House Leader min rawn chhanna kha, chutianga siam tum a nih si chuan, AAI kutah hian Lengpui Airport hi hlan kan la tum dawn zel em?

**HON. SPEAKER** : *Zawhbelhna* - Pu H. Ginzalala, Champhai North Bialtu.

**PU H. GINZALALA** : Pu Speaker, helicopter service hi kan indaih lo hle mai a, tuna kan neih hi Ministry of Home Affairs niin ka hria a. Kan hotute thusawi news lama ka lo hriat danah chuan, Ministry of Civil Aviation lam atang hian beisei theih a awm nia hriatna ka lo nei deuh a. Chu chu eng nge a thlen chin?

Tin, GAD hnuaiah office hrang hrangte leh, ram pawh a awm vek niin ka hria a. Chu chu lo ni ta se; kawngpui anah Sawrkarin ram te, office te a lo nei a, kawngpui zauh nan feet 3 - 10 thleng pawhin pek theih dan a awm lo maw aw, tih ka ngaihtuah a. *Entirnan*: Bawngkawm atang Chaltlang pan chhohna ah khian ZOHANDCO te, Transport te, Agriculture te a awm a; khing ho ram hi tereuhte talin kawngpui zauh nan a hman theih em? Hei, Treasury Square-a DC ram te pawh hi kawngpui zauh nan tlem kan pe thei? Traffice lo tawt bawk thin nen; a tlem emaw, a tam emaw GAD hian a ram hi sahthlak dan awm se a duhawm khawpin ka ring a. Khatianga sawrkar berin a ram phal takin vantlang tana kan pek theih hlauh chuan, mipuiah pawh awareness tha tak kan hnutchhiah dawn a ni. Kan Pathian thu pawhin, '*Pe rawh u; tichuan, pekin in awm ang*', a tih ang deuhin, sawrkar hian a tlem emaw, a tam emaw, feet hnih-khat lek pawh ni se, kan pe thei em?

**HON. SPEAKER** : *Zawhbelhna* - Pu Lalrintluanga Sailo, Dampa Bialtu.

**PU LALRINTLUANGA SAILO**: Pu Speaker, ka zawhbelhna chu –

- i) Lunglei Kawmzawl-ah sawrkar hmasain Airport siam tura hma a lak kha, he sawrkar thar hian kalpui zel a tum em?
- ii) Lengpui Airport hi he sawrkar thar a lo din khan sawiselna nasa tak a awm a, midang hnena hlan chhawn tum anga sawi a tam hle a. Hei hi midang hnenah pekchhawn tumna a awm em? Awm se, engnge a chhan?

**HON. SPEAKER** : Thu sawi lawk ka duh a. Question-ah kan cheng khawp mai a, kha Airport leh Air Service chungchangah khan ka han cheng deuh a. Minister ten kan department chante hrechiang hle tura kan inngaih rualin, a zawhna nena in relate lo lutuk ang chi hi chu kal thui lutuk lo thei ila, kan minister-te pawh tan pawh an lo inbuaisaih loh lam te pawh a awm thei a. *Entirnan*: Home chungchanga zawhna kha raltlante chungchang a ni a. Tichuan, kan zawhbelhnaah khan kuhva rah chungchang te, Burma border issue lam te kha kan kai daih mai a. Khatianga lo deuh khan, kan zawhnaah hian cheng hram hram ila. Tunah zawhna pawh kha Airport leh Air Service chungchang kha a ni a.

Aw le, a theih ang anga chhang turin GAD changtu, kan Chief Minster Pu Lalduhoma ilo sawm ang.

**PU LALDUHOMA, HON. CHIEF MINISTER:** Pu Speaker, Cargo hi kan ngai pawimawh a, kan policy-ah pawh kan telh a. A chhan chu, thlawhna hmangin (a man tlawm si a) market tha kan pawh theihna tur a ni a, kan ngai pawimawh hle a. Sawrkar hmasa pawh khan a ngai pawimawh a, Lengpui Airport-ah khuan a sakna tur hmun a lo siam tawh a ni. Sum pawh SASCI hnuai a lo ruahman, mahse khami sum an dah kha work component pakhat zingah an telh avang khan, sanction a nih khan an lo drop leh ta a. A sum ber a awm loh chuan a sak theih ta rih lo a ni.

Tun sawrkar thar hian, ‘engtia kalpui tur nge’ tih a ngaihtuah mek a. Tuna kan Airport operational cost hrim hrim leh, tuna sum lo lut en chuan kan sum sen, kan invest tawh atanga ngaihtuah chuan, kan hloh nasa em em a, kan la invest leh tur ngaihtuah phei chuan kan zo lo a ni. Hei hi chu rilru nata lak chi pawh a ni lova, keini ang leiba delh beh sawrkar tan Airport sawrkar-ina neih hi; India ram state dangah pawh sawrkarin a neih duh tawh loh a ni a, chutih laia a pachhe berin kan lo kuah bet tlat hi chu, kan economy ngaihtuahin, a fuh kan ti lo a ni.

Chuvang chuan, ‘engtia tih zel chi nge ni ang’, tih ngaihtuah tu din a ni a, chu chuan cargo pawh a rawn keng tel lo thei lo a ni. Adviser to Chief Minister, Pu TBC Lalvenchhunga chairman-na hnuai a he hi dah a ni a, Ni 3.5.2024 hmain sawrkarah report an rawn theh lut dawn a ni. Chu chuan ‘kan sawrkar hian kan Airport hi kan senso in kan la cheibawl zui zel dawn nge, Airport Authority of India ah kan dawn?’ tih te, ‘A stake-holder dang private-ho hnenah kan hlan dawn nge, Air Force-ah kan hlan dawn?’ tih te, khang zawng zawng kha lo dawr kual sela. Chu an dawr kualnaah chuan option hrang hrang a awm dawn a. Lo pe dawn ta ila, ‘a engnge tha ber ang?’ tih te-ah hian an report kan nghak mek a ni. AAI hnena pek a nih hian, an ni hian an outsource chhawng leh tho a; Guwahati Airport te pawh tunah khuan private-ah pek a lo ni tawh a. Chuvang chuan, AAI hnena kan peka, midang hnena an pek chhawn tho ai chuan, ‘an pek leh chhawn tur te kha direct-in pe mai ila, pawisa kan dawng hnem thei zawk ang a’, tih kan ngaihtuah bawk a; chung zawng zawng chu an rawn hma tel vek dawn a ni. A report kan dawn hnuah kan kalpui zel dan tur chu kan sawi thei chauh dawn a ni.

Tin, Pu Speaker, a ram khu mimalin an lo encroach nasa em em tawh mai a. Midang kutah hlan dawn ngawt ila, a ram chin khu a buai a ni. Mi thil tithei tak tak te’n Airport Area chhungah LSC an lo nei thluah tawh mai a. Chuvang chuan, Revenue Department-in a rang thei ang berin survey hna thawk sela, an thawh zawh veleh kan ram chinah chuan kan hung ang a, a hnung hna chu, a sum nen GAD lamin lo buaipui se kan ti a. Revenue Department hi an indaih lo hle mai a. Amaherawhchu, mi kuta kan hlan dawn anih chuan kan ram chin a chiang tur a ni. Tichuan, kan hung ang a, khangtu pawh kan



ngah viau mai thei; dik lo taka titute emawin khulai ram an lo inpek khuan, kan lu a ti hai hle mai a, kan inhlan chhawn leh zelna turah pawh min tibuai a ni.

Tin, helicopter service tuna kan neih mek hi Pawan Hans - Dauphin twin engine a ni a, kan khawp kham lo a ni. Sawrkar hian kan hloh char char a; hlah lo turin siam dawn ila, mi-rethei zawk leh dam lote'n an ban phak dawn si lova. Chuvang chuan, 'mipui tan chuan kan insengso tur a lawm,' kan ti a, kan in sengso mek zel a. Delhi-Civil Aviation Ministry-ah kan kalin kan sawi hova, keimahni Mizo-officer te pawh a ministry-ah khuan dinhmun sang tak tak chelh te an lo awm a, an tangkai khawp mai a. Tichuan, regional connectivity scheme hnuaiah hian ruahmanna kan siam mek a. Heliport thar 11 siam belh kan ti a, chu chu district tinah a ni dawn a ni. Tuin, 'Helipad' kan tih, kan hriat than pangngai hi 15 siam belh bawk ila kan ti a. Chutiang chuan, a heliport leh a helipad bakah, a ruhrel infrastructure hi neih belh phawt kan ti a.

Tin, tunah hian Pawan Hans Helicopter hi kan khawp kham lova, chuvangin Sky One Pvt. Ltd. te kan dawr mek a, kan inbe mek a. An ni hian 5-6 vel an nei a, Sikkim lamah an operate mekin ka hria a. Chu chu kan han dawr a, an rem thei turah te kan han beisei deuh a, hmanhmawh takin he thil hi tunah hian kan kal pui mek a ni.

**HON. SPEAKER** : Khawngaihin, *Zawhna & Chhanna* hun a zo a, tikhan. A chhang laklawh viau mai a, kan chhan zawh tir law law dawn em ni ang? (*House-in a remti a*) Aw le, chhang chhunzawm rawh le.

**PU LALDUHOMA, HON. CHIEF MINISTER:** Aw le, Pu Speaker.

Tin, kawngpui ana sawrkar ram hi, GAD hi chuan a building allotment lam te, Mizoram pawna Mizoram House-te a kengkawh deuh a. A ram hrim hrim chu a department ta a ni a, Revenue Department pawh chulaiah chuan thuneitu a nih zawk mahna lai a awm theiin ka ring a. Kawngpui kan zauh dawn a, vantlangin kan mamawh a nih chuan, mimal ten harsatna an siam thin a; sawrkar erawh hi chuan harsatna kan siam lo turah ngai phawt mai ila. Khang kawngpui zauhnaah khan department ram a lo awm a nih chuan, a department hotute nena inberemin (vantlang tan na na na chuan) mimal kan dawr ai chuan a awlsam zawk turah han ngai phawt ta ila a tha ang e.

Tin, Kawmzawl Airport chungchang sawi hi a rei tawh khawp mai a. Kan hre thin a, a tak hmuh tur erawh chu a la awm lova. Tun dinhmunah hian eng ang chiahin nge sawrkar hmasa ten hma an lo laka, 'tunah hian eng dinhmunah chiah nge a din' tih kha ka chhang mai thei lova, hei hi chu a dinhmun kan lo enfiah phawt ang e. Ka lawm e.

**ELECTION TO FINANCIAL COMMITTEES:**

**HON. SPEAKER** : A lawmawm e. Tunah chuan, *Election to Financial Committees* ah kan kal ang a. Financial Committee peng hrang hrang 4 a awm a, heng –

- 1) Public Accounts Committee;
- 2) Committee on Estimates;
- 3) Committee on Public Undertakings;
- 4) Committee on Local Fund Accounts te hi awm a.

Heng member-te ruatna tur Motion chu Ni 26<sup>th</sup> February, 2024 (Thawhtanni) khan Hon. Minister of Parliamentary Affairs aiawhin Pu Lalthansanga'n a move tawh a. Member turte nomination file hun hi, Ni 28.2.2024 (Nilaini) chawhnu dar 1:00 thleng kha a ni a. Tin, Ni 29.2.2024 chawhnu dar 1:00 thleng kha nomination withdraw theihna hun a ni bawk a. Amaherawhchu, party hrang hrang atangin heng Committee Member atana nomination dawnte a nihna tur ang taka siam rem a nih theih takah chuan, inthlan hi neih a tul ta lova. Heng a hnuai member-te hi Committee hrang hrang Member atan 'thlan a ni' tih ka puang e. Committee peng hrang hrangte leh Memberte chu hetiang hi an ni e –

**Public Accounts Committee:**

1. Pu V.L. Zaithanzama,
2. Pu W. Chhuanawma,
3. Lt. Col. Clement Lalhmingthanga,
4. Pu TBC Lalvenchunga,
5. Pu Lalchhandama Ralte,
6. Pu C. Ngunlianchunga,
7. Dr. K. Beichhua te an ni. Member 7 zel an ni kan tih kha.

**Committee on Estimates:**

1. Pu W. Chhuanawma,
2. Pu Lalmuanpuia Punte,
3. Pu T. Lalhlimpuia,
4. Pu Jeje Lalpekhlua,
5. Pu Lalrintluanga Sailo,
6. Pu Robert Romawia Royte,
7. Pu C. Ngunlianchunga te an ni.

**Committee on Public Undertakings:**

1. Lt. Col. Clement Lalhmingthanga,
2. Pu H. Ginzalala,
3. Pu Lalramliana Papua,
4. Pu V. Malsawmtluanga,
5. Pu Ramthanmawia,

6. Pu K. Laldawngliana,
7. Pu K. Hrahmo.

**Committee on Local Fund Accounts:**

1. Pu Lalchhuanthanga,
2. Pu Lalramliana Papuaia,
3. Dr. Lorrain Lalpekliaana Chinzah,
4. Pi Baryl Vanneihsang,
5. Pu H. Lalzirliana,
6. Pu Lalrinsanga Ralte,
7. Pu R. Rohmingliana te an ni a.

Heng Committee hrang hrang chairman turte chu la ruat leh tur an ni ang.

**FINANCIAL BUSINESS:**

Tunah chuan, *Financial Business*-ah kan kal tawh ang a. Chief Minister zahawm tak, Finance changtu ni baw k Pu Lalduhoma'n, Ni 27<sup>th</sup> February, 2024 (Thawhlejni) a budget a pharh tak - *The Annual Budget for the Year, 2024-2025* kha sawihona, *General Discussion* kan nei ho dawn ang a. General Discussion hi ni 2 (vawiin leh naktukah) kan nei ang a. Naktuk, March Ni 5, 2024 ah general discussion hi zawh tur a ni ang.

Aw le, member-te minute engzah nge kan in pek ang le? Minute 10 a tha mai em? (*Minute 10 remtih tlan ani a.*) Aw le, member pakhatin minute 10 zel kan sawi turah ngai ila. Tunge han sawi tan ang le?

Aizawl West-III Bialtu, Member zahawm tak Pu V.L. Zaithanzama ilo sawm ang.

**PU VL. ZAITHANZAMA:** Pu Speaker, ka lawm e. Mizoram Legislative Assembly vawi 9-na chhunga kan Budget Session hmasa berah budget tha leh ngaihnaawm tak sawihonaa ka tel ve thei hi ka lawm hle mai. Kan Finance Minister hian hriatthiam awlsam takin a vawikhat budget pharhnaah *budget-langtlang* min han chhawp chhuah sak hi ka ngaihsan zual phah hle a ni.

Zoram-mipui tam ber eizawna 'Agriculture' atanga kan thawh chhuah tipung turin he budget hian min pui ngei dawn niin a lang a; uluk taka han chhiar hian chu chu kan hmu thei a ni. Mizoram mipui tam ber kut-hnathawktute'n lei rem an rah hma loh chuan, hmasawna kawng dik kan zawh ngai lovang. Sawrkar sum dinhmun siam tha tura kan hmalakna lo lang hian min ti lawm hle a. Tunah hian '*year of consolidation*' a puan ngai khawpin kan dinhmun hi a tha lo a ni a. Lei rem kan rah theihna turin he budget hian kawng tam takah hmalakna tur a lo tarlang a, chungte chu tlem tlem han sawi hmasa ila.

A pakhatna-a pawimawh ber mai chu, *Eirukna-do* hi a ni. Hei hi thapui thawha kan do a ngai tak zet a. CBI hnenah Mizoram chhunga hlemhletna te chhui thei tura phalna pek a lo ni ta a. Kan ramah kan sawi nasa a, eirukna hian bu a khuar nghet hle a ni. Mihausa leh mirethei inkar a zau ta hle mai a, hemi ka ngaihtuah laia ka rilrua awm chu - CBI hnenah hlemhletna te chhui thei tura phalna pek kan tih rual hian, ‘CBI kutah kan innghat mai dawn em’ tih hi ka ngaihtuah a ni. CBI kutah hian innghat mai lovin, keimahni hian tih takzetin i do ang u. CBI chuan a theihna naah a lo ti bawk ang a. Kan hlawhchham chuan a pawl lutuk dawn a, chuvangin, theihtawpa eirukna do turin he House zahawm tak hi ka ngen a ni.

Kut-hnathawktute tan thu lawmawm tak mai kan hmu a, kuthnathawka eizawngtute *minimum support price* tha, thlai thlan bik pali - sawhthing, aieng, hmarcha, hmunphiah te tan a lo lang a; minimum support price hmanga tanpuitu thil thar tangkai zet mai tur a ni a, hei hian kut-hnathawktute a chawikan ngei ka ring tak zet a ni.

A dang lehah chuan, thil pawimawh deuh mai, *Ruihhlo-do* chung chang kan hmu a. KTP khawmpuiin ruihhlo dona leh hmalak a tum thu he kan budget kan buaipui laia kan lo hriat tel hian min tilawm a, Mizo thalaite hnathawk thei lova siamtu, chhungkaw tam tak tlakranna hi thapui thawha kan do a tul tawh tak zet a ni. Hei hian kan ram sum dinhmun engkim mai a tichhia a ni. hei hi tihtak zeta kan do chuan, kan ram economy pawh hma min sawn tir ang; kan do that loh erawh chuan, chhungkaw tin hei hian harsatna min siam tan mek a ni.

Aw le, kawngpui leh lei dawh tha lote thawm that nan crore 100 dah te hi a tha takzet a. Kawng chhia hi sum tam tak eiraltu a ni a, motor-in a chhiat hma phah a, bungraw phurh man a to a, mi zawng zawng nghawng a ni tak zet a. Hemi lo lang hi a lawmawm tak zet a ni.

Tin, States-own tax revenue 2024-2025 ah crore 1312.42 hmuh kan beisei ngam ta hi ropui ka ti a, kum kal mek aia 21% pung tura kan ruahman ngam te hi a ropui tak zet a ni.

Tin, Biometrics Attendance System department zawng zawngah hman tum a ni a, hei hian eng emaw chen min tihdanglam ngei a beisei awm.

Tin, hun lo kal zel tura kan tu leh fate hre renga, huaisen taka Stamp Duty 1% atanga 3% a kan tisang tur hian, ‘kan hmalam hun, thangthar lo awmzel turte thlir chunga budget hi huaisen taka siam a ni’ tih a tilang Chiang a. Mizote hi kan pi leh pute atangin chhiah pe hnam kan ni a, chhiah pek kan hreh ngai lo. A hmanna tur kan hriat chian chuan, ‘chhiah pe hreh lo tak hnam kan ni’ tih kha ka han sawi tel hram duh a. Chuvang chuan, hei pawh hi a hlawhtlin ngei ka ring a ni.

Healthcare scheme lama indaihlohna puhruk nan crore 20 dah leh, healthcare bill ba ruhna tur crore 40, 2023-2024 RE ah kan han dah hi lawmawm ka ti tak zet a. Kan Finance Minister hian healthcare a ngaipawimawh hle mai a, healthcare scheme changtlung leh hlawk zawk tunah hian duan mek a ni a, hei hian mi tamtak a tuam dam ngeiin a rinawm a ni.

Tichuan, kumin 2024-2025 hi *sum leh pai inrenchemna* kumah puan a ni dawn a, theihtawpa kan leiba sang lutuk tur tihhniam a ni tur hi, a lawmawm takzet a. Kum 2024-2025 ah sum puk tur ‘crore 697.69-a tih hniam a ni dawn’ tih lo lang hi a huaisen thlak tak zet a. Leiba sang lutuk tawh tih hniam hi a tul tawh tak zet a ni. Leiba hian mi a delh bet tan a, kan hre vek awm e.

Tin Tar-pension tan state sawrkarin ₹100/- a a do let thin kha, tunah chuan ₹1,000/- a tihpun tur tih he kan budget-a lo lang hi, kan upate tan chuan thlamuanna lawmawm tak a ni.

Thil dang lo lang lawmawm em em bawk chu, domestic electric bill he sawrkar hian tihsan a tum lo hi a ni. Tun hmain a sang chho zel a, tuna kan bill hmanlai hi mitam tak tan chuan a rit tawh fu a ni. Transformer hlui lutuk a thar a thlak te, roof-top solar tangkai zawka hman dan tur te bakah power supply mumal zawka kalpui a nih theih nan crore 21.13 lo lang te hi a tha hle a. Eng chhit man tisang chuang silova power supply tihpun dan kawng zawn tum a ni hi tha ka ti hle bawk a ni.

Pu Speaker, sawi hmaih theih loh, kan sawrkar tharin zirna siam that a bulthum atangin a tum dawn a, naupangte rilru put hmang siam tha turin hmalak a ni dawn a ni. Hetiang siamthat dan tur inkawhmmuhna syllabus ah tih tel tum a ni a. Zirna-in hi a pawimawh hle mai a, kan ram future siam tu turte an ni a. Ka bial chhungah zirna-inte ka tlawh kual a, ngaihsak an lo hlauh lo em em mai a. School building chhe lutuk hian naupangte an moral a tichhia a, ngaihsaktu neilo ang maia inngai an awm tawh a ni. Chuvang chuan, zirna ngaihsak thar a ni tur hian min ti lawm hle a ni.

Tin, khawsak harsa zual tan thingtlang lama mithi ruang phurhna tura crore 5 ruahman a ni te hi a lawmawm ka ti a, thil la awm ngai lo a ni a. Vawiinniah hian, Pu Speaker, ka lawmna leh em em chu, Capital Expenditure vaibelchhe 17.03 chauh tarlan a ni hi a huaisen thlak ka ti a, nih ang anga lanchhuah pui ngam - Finance Minister, House Leader ni bawk kan nei hi lawmawm ka ti tak zet zet a ni.

Tichuan, budget-langtlang, hriatthiam awlsam, cheimawi chawp ni lo, anih ang anga budget tarlanna tha zet mai, 2024 - 2025 atan kan House Leader zahawm takin a rawn pharh hi pass-pui turin he House zahawm tak hi ka rawn ngen e. ka lawm e.

**HON. SPEAKER** : Tunge han sawi leh ang? Sawi ang khan, naktukah khan sawi chhonzawm tur a ni dawn a. Tunah South Tuipui bialtu zahawm tak Pu Jeje Lalpekhlu a ilo sawm ang.

**PU JEJE LALPEKHLUA:** Pu Speaker, kan CM zahawm tak leh Finance changtu ni bawkin Mizoram Budget 2024-2025 pharh tak ang khan, thil lawmawm tak hmuh tur a awm a. A zavai mai khan han sawi a chakawm rualin Pu Speaker, I remtihain, tlemte chauh han sawi ve ka duh a. Budget bu page 1 - thuhmahruai-ah khan a rawn ziaak lang a, hei hian a funkim viauin ka hria a, ka han chhiar ang e -

“He budget kan buatsaih laia kan ngaih pawimawh ber chu - Zoram mipui te tan a ei leh bar zawna kawng tlo leh nghet zawk buatsaih hi a ni a, chumi tihlawhtling tur chuan langlang leh rinawm taka sum leh pai enkawl hi kan ngaih pawimawh hmasak tur a ni” tih a ni a. Tin, heng sumte hian ‘mipuite a thleng ngei a ni’ tih leh, ‘tang kai taka hman a ni em’ tih kha va finfiah kha kan tum tlat a ni. Hei hi a budget tiropuitu pawh niin ka hria a.

Keini kan bial hi miharsa te te awmkhawm kan ni a. Sawrkar kal ta ah khan a thlenna hmun tur tak miharsa tak takte kutah a thleng kim lo deuh ten ka hre thin a. Tunah chuan, budget ropui tak, a thlenna tur dik tak, a thlenna tur finfiah tum a nih thu a changtu Ministerin a rawn sawi lang te hi lawmawm viauin ka hria a. Tin, kan CM (kan Finance Minister ni baw) in kan budget a pharh ah khan sawrkar leiba titla hniam zawng kan hmu kha a ropui hlein ka hria a. Kum 2023-2024 Budget Estimate-ah khan kan leiba kha GSDP atanga 37.84% lai a ni a, budget tharah budget Estimate 29.22% a tihlak hniam sawrkarin a tum tih kan hmu a. He thil hi tu pawh sawrkar siamtu ni se, kan ram dinhmun mek thlira chona lian ber zinga mi a niin ka hria a. Mipui tan pawh thil lawmawm tak a niin ka hria.

Tin, thil lawmawm tak sawilan loh theih loh nia ka hriat chu, Mizoram sawrkarin kum 1 chhunga sum a thawhchhuah ve tur *state-own revenue tax* a ruahman ₹24,34.81 crore lai mai kan hmuh kha a ni a. Kum kal mek 2023-2024 Budget Estimate aiin kan state sawrkarin sum thawhchhuah a tum zat hi 22.29% laiin target a sang zawk dawn a. Kan ram dinhmun kan thlir mek chuan, kan harsatna lian ber pakhat chu - state-in sum thawhchhuah kan nei tlem lutuk hi a ni a. Helam kawnga kan hotute’n target sang zawk leh chona sang zawk an rawn ruahman ngam hi a ropui hlein ka hria a, a aia sang zel hi target zel thei ila a duhawm khawp mai.

Tin, kan budget kan en chuan, Mizoram-a chhungkaw tam ber pawl, a bik takin khawpui pawn thingtlanga chengte inngahna, ei leh bar zawna leh an hmuhna ber - Agriculture & Allied Sector kha kan state puma mipuite’n ei leh bar kan zawna sector hrang hranga sum thawhchhuak tlem ber sector a nih kha, hun lo kal zel tur thlir pawhin, chona sang tak mai a niin ka hria a. Chutih rual chuan, thil lawmawm tak lo lang tel erawh chu –

kut-hnathawktute thlai tharchhuah mumal zawk leh hlawk zawka state pawn thlenga hralh chhuah dan tur ngaihtuahtu tur Agriculture Minister Chairman-na hnuaiiah ‘Agriculture Market Assurance Fund Management Board’ din hi a ni. Anni hian theihtawp chhuahin an ngaihtuahna an seng ang a, chhungkaw tam takte eizawna leh inngahna ber Agriculture & Allied Sector hian kan GSDP-ah pawh contribution sang zawk a neih theih hi a duhawm hle.

Tin, kan budget pharh tak atanga thil lo lang ka sawi leh duh chu, Mizoram Research Mobilization Committee (MRMC) din a ni tih kan hria a. Kan hriat theuh angin Mizoram sawrkarin a mamawh ber chu, kan sum hmanna hrang hrang uluk taka zirchiana, tihhniam theih chu tihhniam dan zawn leh, kan state sum lakluh tihpun dan zawn kha a ni a. Heng thil pawimawh tak mai kan ngaihtuah leh thawktu tur pawimawh tak kan CM kaihhruaina hnuaiia din a ni hi a ropuiin, Mizoram tan *bung-thar* duhawm tak niin ka hria a. Huaisen takin Mizoram tana tha ber tura hna thawk zel turin duhsakna ka hlan nghal duh bawka a.

Pu Speaker, i remtihna - Anti-corruption measures-ah khan kan ram hi kan hria a, kan ram tichhetu chu ‘eirukna’ hi a ni a; kan ram min tichhetu ber sukiang tur chuan eirukna kan do ngam a ngaiin ka hria a. Sawrkarin CBI te hnena state chhunga hlemhletna awmte chhui thei turin phalna a pe te hi a ropui ka ti em em a, hetiangaw sawrkar langtlang kan nei thei te pawh hi a vanneihthlak viauin ka hria a.

Mizoram hi a bikin Assam nen ramri chungchangah buaina vawi tam kan nei tawh a, chumi hre reng chuan kan sawrkarin *Mizoram State Boundary Committee* Home Minister kaihhruaina hnuaiia a han siam nghal te pawh hi a ropui ka ti em em a. Tin, zu leh ruihhlo do kawngah sawrkarin budget-ah pawh nuai 50 a han dah nghal ringawt te pawh hi a lawmawm ka ti a. He House zahawm tak kaltlanga mipuite ka chah ve duh chu - ruihhlo do kawngah hian theihtawpa kan thawh hona a ngai a ni; Mizo mipuite kan thawh hona a that loh chuan, ruihhlo hi kan do rem thei dawn lo. Chuvang chuan, vawiin niah hian he House zahawm tak kaltlangin mipuite hnena ka ngen duh chu - ruihhlo hian vawiin niah kan inchhung min la luhkhung lo thei, mahse naktukah chuan min luhkhung hun a lo la awm thei. Chuvangin, tuna hun tlem kan la neih lai hian, ‘hawh u, Mizoram tan...’ tia kan zavaia thawk hoa, ruihhlo do kawnga kan sawrkar hmalaknate support turin ka han sawm nghal bawka a ni.

Tin, kan CM-in budget a pharh tak atanga thil lawmawm tak kan hmuh chu – ‘sawrkarin mipuite hriselna a ngaipawimawh hle dawn’ tih a lang hi a ni a. Khawvel ram changkangte pawhin healthcare hi an buaipui ber pakhat a ni reng a; healthcare security tha nei lo chuan mipuite an thla a muang tak tak thei lo a ni. ‘Kan sawrkarin healthcare scheme changtlung leh huapzau zawk mipuite tan a duang mek a ni’ tih kan hmuh kha mipuite tan thil lawmawm leh chhinchhiahtlak tak a niin ka hria a.

Kan budget-ah khan kut-hnathawktute thlai-thar, a bikin thlai thar zinga pali - sawhthing, aieng, hmarcha leh hmunphiah te atana market security siamsakin Minimum Support Price (MSP) kan budget-a dah a ni ta te hi a lawmawm hlein ka hria a. Hei hi thil chhinchhiahtlak tak a ni a, 'kut-hnathawktute tan sawrkar a awm a ni' tih leh, kan budget hian kut-hnathawktute a thleng dawn a ni' tih a lan tir chiang hlein ka hria a. Hei hi chu, kei hi a lawm berte zinga mi ka ni ang a. Kan bial – 29 Tuipui South pheih chu kuthnathawktute tamna ber bial kan ni mai awm mang e aw tih chang te pawh hi ka nei thin a. Hetianga sawrkarin ruahmanna fel tak a lo siamte hi, keini bial tan chuan lawmna nasa tak a ni.

Tin, Pu Speaker, sawi duh tam tak ka nei a; a tawpna atana ka sawi leh duh chu, he House zahawm taka thute hi Mizoram mipuite'n an aiawha rorel tur leh Mizoram tha zawk siama, midangte hmasawn dan kawng zawh ang zawhpui ve turin beiseina sang tak nena an thlanchhuahte kan zavai hian kan ni a. Pathian hian mitinte hi kan hun a ruat a, he House zahawm taka thute hian helai hmunah hian han thut reng pawh duh mah ila, kan thu reng dawn lo; engtik niah emaw chuan kan hun a liam ang a, midangte'n keini ho hi min rawn thlak ve hun a la awm dawn a ni. Vawiin niah hian kei ve maiin kan House-a Member zahawm takte ka han ngen ve duh chu - 'eng chena rei nge he House zahawm takah hian member-te hi kan thut' tih aiin, 'he House zahawm taka member nia kan thut ve chhung hian, kan ram siamtha turin engzata tam nge hna kan thawha, Mizoram siamtha zel turin pen engzat nge ke kan pen' tih zawk hi, nakina thangthar fel zawk kan tu leh fate hian hriat an duh dawn ngeiin ka ring. Chuvangin, Mizoram dinhmun mek thlira, siam that a tulna kawnga lungual tak leh huaisen taka, party politics tel lova ke kan pen tlan zel chuan Mizoram hian hma a sawn ngei ka ring tlat a ni. Ka lawm e.

**HON. SPEAKER** : A lawmawm e. Tunah chuan, Champhai South Bialtu, Member zahawm tak Lt. Col. Lalhmingthanga i lo sawm ang.

**LT. COL. CLEMENT LALHMINGTHANGA:** Pu Speaker, ka lawm e. Hemi kan Budget Speech kan han en hian a tlangpui khaikhawma ngaihpawimawh zawngte, henga thu lawmawm tak tak lo langah hian, inrenchemna a pawimawh zia leh inrenchem kan kal pui dawn a ni tih te; kut-hnathawktute chawikanna te leh hlemhletna leh eirukna nuaibo chungchang te, thalaite eizawna a ngaihpawimawh zia te leh thalaite hmasawna chhawmdawlina tur atana hmalakna tur te; ruihhlo dona urhsun zawk a hma lak dan tur te, zirna leh hriselna a ngaihpawimawh zia te leh intodelhna zawngin hma a la dawn a ni tih kan budget speech-ah hian a hmuh theih a.

A hmasa ber, a rawn tanna chuan, kan State sawrkar sumpai dinhmun thlirna a rawn dahchhuak a, kan sumpai dinhmun - tuna kan sawrkar sum lama dinhmun a that loh zia ah tawp mai lovin, chumi tih hmasawna tura hmalakna tur atana a hmasa ber atan tun,



a kum vawi-khatna ‘Year of Consolidation’ atana huaisen tak maia puan a nih te hian, ‘ram hmangaihna rilru dik tak a pu a ni’ tih a hriat em em a.

Tichuan kan State revenue hmasawna tur atana hmatheh chi hrang hrang, chuta tanga hlawkna a dawn tur - Revenue Surplus 2024-2025, ah estimate ah ₹564.95 crore te hi hmuh theih tura beisei a ni a. Kum hmasa lama kan financial dinhmun nena khaikhin chuan a thlamuan thlak em em a ni. Tichuan, hemi atanga ‘Year of Consolidation’ a puana, chumi avanga kan sum puk tur atan a ruahmanna ₹697.69 crore zeta a tlahniam tur te, hi kum danga thil awm ngai lo a ni. Finance changtu kan Chief Minister ni bawkin a ruahmanna a rawn sawi te hi ram mipuite tan chuan a thlamuan thlakin, lawmthu sawina hial tur a ni.

Tin, Mizoram Resource Mobilization Committee chu kan CM zahawm tak chairman-na hnuaiah din a lo ni bawk a. Heng kan sawrkar revenue tih pun dan tur te, tin sawrkarin heng machinery hman tlak tawh loh tih riral dan tur atana disinvestment lampang thleng ngaihtuah tu tur atana he committee din a nih te hi lawmawm ka ti a. Hei hian hmasawna, a sawi a sawi mai ni lova, a tiha ti tak tak turin kan sawrkar, tun sawrkar thar hian hmalak a tum a ni tih a lang chiang em em a ni.

Tichuan anti-corruption measures - hlemhletna umbona tur atana sawrkar tharin hma a lakna tur zinga langsar em em mai pakhat, Central Bureau of Investigation (CBI) Central atanga State chhunga hlem hletna umbona atana chhui thei turin phalna a pek te; tin, chumi piah lamah Mizoram State Project Monitoring Committee din a ni te hian helam pangah hian ke pen tak tak a tum a ni tih a chiang a.

Tin, chutih karah, kan budget-a ‘hand-holding policy’ hi, skill development thalaite leh mipuite tana an skill tangkai zawk leh eizawna tlaka hmang thei tura tanpui turin a rawn chhawp chhuah te; ruihtheih thil dona nichina an rawn chhawp chhuah te; intoxicating substances drive chungchangah chuta hmalakna tur atan a hmatheh ah ₹50 lakh zet mai dah hran a ni a. Tin, Pu Speaker, tun kum chhunga mipuite tana phurrit tak ni thin - Domestic Electric Bill hi tunah chuan tih san tumna a awm rih lova, mipuite tana phurrit siam lova electric bill tih san tumna a awm lo ringawta pawh hian mipuite sum leh pai senna tur tam takin a chhawp dawn a ni.

Tin, chu mai bakah power generate tam leh zel theihna tur atan rooftop solar tangkai zawka hman theihna tur te leh, power infrastructure tha zawk neih theih dan tur te ruah hmanna tam tak a awm a. Heng lampangah hian study team leh chipchiar zawka ngaihtuahna te awm a. Heng a tlangpui a han sawi hmalak tumna ah te hian sawrkar chuan ‘mipui-sawrkar dik tak din a tum a ni’ tih a hmuh theih a, a lawmawm em em a ni.

Tin, chutih rualin, old age pension, ‘tar pension’ kan tih mai hi stage hnihin a kal thin a, kum 79 chung lampang tan Central-in thla tin ₹500/- a rawn pekah kan sawrkar hmasa lampangah chuan a hmasa berin ₹50/- in a lo do ve a, a hnu ah ₹100/- in a tipung a, chumi ₹500/- chu state-in a lo dona nen ₹600/- (State-matching share nen) a lo ni thin a. Chu chu, ₹100/- atang chuan sawrkar thar chuan ₹1000/- (a let sawm) in a tipung dawn a; chuti a nih chuan ₹1500/- a lo ni thei dawn a. Kum 79 hnuai lam tan central-in ₹200/-; State-in ₹100/-; chumi total ₹300/- ni thina kha, State-matching share ₹1000/- a a tihpun chuan, ₹1200/- a lo ni tawh dawn a ni. Hengte hi, kan rual-u te leh old-age ho, kum-upa zawkte sawrkar tharin a ngaihsak zia leh a duat zia a rawn tilang baw k a ni.

Tin, ni dang budget-a kan hmuh ngai loh ‘*gender budget*’ te hmuh tur a awm a. Chu bakah kan sawrkar hian zirna leh hriselna lampangah tan lak a tum nasa em em a. Tichuan, tuna *New Education Policy, 2020* te pawh hi awmze nei zawkin kalpui a tum a; a syllabus te leh a kalpui dan tur erawh chu kan naupangte rilru puthmang leh kan culture, keimahni Mizote kalphung zul zuia hei hi kalpui tura ruahmanna a neih a rawn tarlang baw k a.

Tun hnai maiah khan sawrkar thar chuan *Ministry of Road Transport & Highway* nena inbiaa, Aizawl by-pass tunnel siam tura ruahman te, NH-06 nena intlawhpawhna Sairang to Phaibaw k inkara National Highway, hemi atana by-pass road te, he plan-ina Aizawl chhunga kan buaipui em em traffic congestion zawng zawng hi nasa takin a tizia dawn a, hei hi a taka a rawn thlen hun a nghahhlelh awm em em mai a ni. Heng plan te hi, ‘kawng chhawng’ tih leh ‘lei verh’ tih te ai chuan thil a tak taka thleng chi a ni a. Chuvangin, kan sawrkar hian thil hi a tak takin tih a tum a, ‘a sawi ni lo, a practical-a tih a tum a ni’ tih hi a chiang em em a ni. Hengte hi a lawmawm a.

Tin, kan ram budget 2022 - 2023 te, 2023 - 24 te kan thlir chuanin, *Ways and Means* budget ah khan ₹1000 crore te puk belh tura ruahmanna ni thin a ni. Amaherawhchu, tun sawrkar thar hi chuan 2024-25 atana *Ways and Means*-a bat tura a lo ruahmanna estimate chu ₹3 lakhs chauh a ni. Chu chu a inthlau em em a, sawrkar hian mumal taka budget system kalpui a tum a; tin, ‘hmasaw nna tak tak kalpui a tum a ni’ tih a chiang em em a ni.

Chutih rualin Pu Speaker, kan sawrkar tharin hma a lakna chi hrang hrangah hian lawmthu sawina tur a tam em em a, kan minister hote hmalakna han thlir hian sawi tur a tam a. Hun a chep deuh hlek tawh na a, ka han sawi chhuah duh chu - road lampanga kan mu tan, kan harsatna em em thin - Silchar leh Aizawl inkar, khulai Sairang-a kawng chhia te, a hmun ngeiah kan Minister te zuk kal chat chatin, an zuk chian a. Tin, Lunglei lampangah te pawh hmalak a ni a. Kan Health Minister te pawhin *special package*, hun rei lote chhungin Centra-ah helaia kan ram mamawhte an rawn sawi chhuak a ni.

Tin, Sports lam te leh Narcotics & Excise changtu kan Minister zahawm tak Pu Lalnginglova Hmar te pawhin theihtawp chhuahin, ruihhlo dona tur kawngah an hun awl zawng zawngah committee te ko in hma an la a. Kan Education Minister te, kan Revenue Minister te leh kan Minister dangte hmalakna hi a lawmawm ka ti a, lawmthu ka han sawi bawka ni e.

Chuvangin, tuna kan Budget 2024-2025 hi kan ram tana hmasawna tak tak tur atan a ni tih hriain, 'ka rawn support a ni' tih ka rawn sawi e. Ka lawm e.

**HON. SPEAKER** : A lawmawm e. Serlui Bialtu, Member zahawm tak Pu Lalrinsanga Ralte ilo sawm ang.

**PU LALRINSANGA RALTE:** Pu Speaker, ka lawm e. Vawiina kan sawrkar tharin a budget hmasa ber a pharh thei hi a lawmawm hlein ka hria a. A pharhtu kan House Leader (kan Finance Minister ni bawka) pawh lawmpuina ka han hlan duh a ni.

Pu Speaker, kan Budget speech hi ka han chhiar ka han chhiar a, a ngaihthlaknawm a, a thu pawh a tha hlawm khawp mai a. Ka hlauh ber erawh chu - Budget bu ngaihthlaknawm leh tha tak mai, a tak chang lova zuih ral chho mai a ni ang tih ka hlau a. Chuvang chuan, kan sawrkar pawh hian tang taka tih tur kan ruahman leh kan beiseite kan tihtheihna turin theihtawp chhuaha hma kan lak a ngai dawn a ni.

Tin, Budget bua lo lang, lawmawm em em mai han sawi ve duh ka nei a. Social Welfare Department hnuai ₹50,00,000/- lai mai, mi-rethei leh harsa zawk an thih palh pawha an ruang a thlawna phurh theihna tura dah a ni hi ropui ka ti a. Hei hi kum dangah pawh MLA-te chuan kan harsatpui thin kha a ni a. Bial khatah hian kum khat chhung hian ruang a chhuak hnem thei khawp mai a, a hautak a, fund atanga tih theih a ni si lova, hlauh atangin kan inruahman thin a, a hautak khawp mai a. Sawrkarin hetiang ruahmanna a rawn nei thei hi lawmawm ka ti tak zet a ni.

Tin, Home Minister kaihraina khan *Boundary Committee*, sawrkar hmasain a lo din tawh, chumi kal zelah kan sawrkar tharin '*thil tha chu chhonzawm a tha e*' tia an rawn chhonzawm chho hi a lawmawm hlein ka hria a. Kan ramah pheichuan tunah leh term hmasaah te pawh, kan bial chhungah harsatna namen lo te kan tawka; ramri chungchangah sawrkar tharin hetiang *Boundary Committee* a rawn din chho zel hi a lawmawm hlein ka hre bawka ni.

Tin, *Mizoram State Project Monitoring Committee* din a ni te hi a lawmawm tak zet in ka hria a. Tin, *Mizoram Resource Mobilisation Committee*, sawrkar hmasa-ina a lo din tawh, tun sawrkar pawhin tha tia a kal chhoh pui hi lawmawm ka ti bawka. Sawrkar hmasaah khan *Resource Mobilisation Committee* hi din niin, pawisa pawh crore eng emaw zat kha an rawn hmu chhuak a. Hei hi thil tangkai leh, sawrkarin a hman tangkai

phawt chuan tuna Mizoram Resource Mobilisation Committee te pawh hian hlawk takin hna an thawh ngei kan ring a ni.

Pu Speaker, han sawi tel leha ka duh chu, vawiinah hian budget ka han en a, hetah hian, ‘*the Mizoram Fiscal Responsibility and Budget Management Act, 2006*’ kan han en bawka. Chulaia rilrua lo lang pakhat chu – State’s own tax Revenue-ah hian ₹1,31,242 lakh hmuh tum a ni a. Sawrkar kum kal lai mek aia hmuh tam kan beiseina chu ₹22,812.32 lakh a ni. Tin, State’s own non-tax Revenue-ah pawh hian kan hmuh tum hi ₹1,12,238.93 lakh a ni a, kum kal lai mek ai hian a pawisa a kan beisei tam zawkna chu ₹22,539.5 lakh a ni.

Pu Speaker, sawrkar hmasaa Finance Minister-in budget a pharh reng reng khan a figure hi rintlak a ni lova; rin tlak, ‘tehma dik lo thei lo chu, GSDP a ni’ tih hi an sawi thin a ni a, i ding lama thu te’n. Tin, vawiinah hei hi a ropui khawp mai. Sawrkarin sum leh pai kan deh chhuah tur leh kan thawh chhuah tur a pawisa a punga rawn lang hi. Amaherawhchu, ka han sawi duh chu, mihring kan pung chhoin, tax lak a rawn tam chho zel a, chhiah a pung chho zel a ni. Chuvang chuan, budget-ah, nakumah pawh hei ai hian State’s own tax Revenue leh State’s own non-tax Revenue te hi rawn la pung chho leh tura ngaih a ni a, a figure hi chu.

Amaherawhchu, ‘tehma dik lo thei lo’ kan tiha kan sawi thin, ‘indicator as percent of GSDP’-ah hian, State’s own tax Revenue hi 2021-22 *actuals*-ah 3.31 a ni a. 2022-23 (Actuals)-ah hian 3.36 a ni. Vawiina 2024-25 BE-a kan beisei zat hi 2.73 chauh a ni. He mi awmzia chu - helaiyah hian a figure tam mah se, ‘tehma dik lo thei lo’ kan tih GSDP-ah chuan sawrkar hmasa aiin kan tlahniam hle a ni. Chuvang chuan, State’s own non-tax Revenue-ah pawh hian 2021-22 (Actuals) ah 2.41 te, 2022-23-ah 3.13 (Actuals) te a ni a. Tin, 2024-25, tun budget rawn pharh takah hian 2.34 chauh ni tura beisei a ni.

Chuvang chuan, Pu Speaker, theihtawpa tan kan lak a ngai a. He kan State own-tax revenue leh State’s own non-tax Revenue hi a figure-ah hian tam mahse, a tak takah chuan sawrkar hmasa kha kan phak lo deuh em aw, a GSDP atanga teh chuan? Sawrkar hmasaah kan sawi lar bawka, ‘tehma dik lo thei lo’ kan ti bawka; Sawrkar hmasa ai khan kan tlahniam tlat a ni.

Chuvang chuan, Pu Speaker, kan sawrkar hian sum deh chhuah tam kan duh luatah mipui, mirethei leh harsa zawkte tibuai lo zawnga hma kan lak a tulin ka hria a. Kan resource neih angte kan hman thiama, sum lak luh dan kawng dang kan zawn a tul hlein ka hria a ni.

Tin, Gross fiscal deficit, sum lak luh leh hman chhuah chungchang inthlahna hi tawite han sawi ka duh a. 2023-24 BE-ah khan ₹1247.20 crore a ni a, 2024-25-ah hian BE-ah ₹1365.70 crore-in a pung a ni. Chuvang chuan, he budget hi kan inruahmanna, kan

beiseina a ni a. Sawrkar hmasaah pawh khan kan inbeiseina chu ₹1247.02 crore a nih rual khan, RE-ah chuan a rawn pel chho tho a ni. Chuvang chuan, tunah pawh hian sawrkar hmasa ai khan sum lak luh leh hman chhuah inthlauhna hi nasa zawk taka pung turin tun 2024-25-ah hian ruahman a ni a. Hei mai bakah hian nakinah RE a rawn chhuah hunah chuan nasa takin a rawn pelh chhoh a hlauhawm hlein ka hria. Chuvang chuan, sawrkar pawh fimkhur taka kan kal a ngai dawnin ka hria a ni.

Tin, budget-ah hian ‘revenue expenditure’ hi budget pumpui atanga 82.97% a ni a. Tin, ‘capital expenditure’ kan tih, sawrkarin hmasawna tur ruhrel leh ruangam a din, infrastructure a tih theihna tur te hi 17.03% chauh a ni ta a, a pawl khawpin ka hria a. Kan Finance Minister budget speech-a a rawn lan danin, ‘sawrkar hnathawk hlauh pung te, DA pung chho te leh thil man sang zel avangin revenue expenditure hi a sang lo thei lo a ni’ tia a sawi hi a dik khawp mai a, ka pawm khawp mai. Chumi rual erawh chuan, kan sawrkarin ‘Year of Consolidation’ tiin kan puang bawk a, he kan revenue expenditure tihhnamna tur hian capital expenditure, ram chung hmasawna ruhrel khawih turte a sum kan dah tam theihna zawk tur hian, a Ministry kengtu Chief Minister leh kan Minister-te, Adviser to CM te, Board hrang hrang leh office Department hrang hrangah te hian kan OE (office expenditure) te hi hei aia enawn deuha, tih hniam deuh theih dan te a awm em? Tin, *medical reimbursement*-ah te hei aia khauh leh dik, fel-fai zawka kalpui theih dan zawkte a awm ang em? Tin, travelling allowance te, hei aia ruahmanna tha hi a awm thei ang em? Hetiang zawng hian, ‘Year of Consolidation’ kan ti ta ro ro bawk a, hma kan lak tel hi a tha hlein ka ring a ni. Chuvang chuan, Pu Speaker, capital expenditure hi kan ngah deuh deuh theihna turin, sawrkarin revenue expenditure-ah hian kan insum deuh theih dan kawng kan zawn kha a tul thei hlein ka hre bawk a ni.

Tin, Pu Speaker, hei, kan budget hi ka lo chhiar ngun khawp mai a, lang ngei ngei tura ka ngaih ka lo beisei em em mai, mahse budget speech-a rawn lang ta lo awma chu, Development Bank din a nih tur thu hi lang tura ka lo beisei a ni.

Pu Speaker, i phalnain, *The Zoram Times*, Ni 10<sup>th</sup> December, 2021 chhuakina a tarlan danin, Siaha hmunah tihian kan House Leader, ZPM Leader Pu Lalduhoma thusawi – “ZPM-in sawrkarna an chan chuan, sawrkarin Development Bank a din dawn a, puih tlakte chu loan pung awm lo chi te, a pung tlem chi te pein, sawrkar chu guarantor ah atang ang a; tih tak zeta dinchhuah tumte chuan an hlawhtlinpui em em ang” tih a awm a. Pu Speaker, hei hi thalai, mahnia inhaikaw zo lote tin, theihtawp chhuaha hmala duh tam tak ten kan lo beisei a ni a; he Development Bank chungchang hi tun budget-ah hian a lo lang lo a nih pawhin, nakum budget-ah chuan a lan ngei ka beisei a ni.

Tin, ZPM sawrkar policy pui ber mai ‘*hand-holding policy*’ ah hian ₹200 crore chiah mai dah a ni hi a beitham deuh em aw ka ti a, Pu Speaker, sawrkar hmasa - MNF te, Congress ten an policy pui bera an pawisa dah nen hi chuan han khaikhin ila, a beitham

hle in ka hria. He ₹200 crore hian kut-hnathawktu, an thali-thar kan leisak turte, price support kan pek turte leh thil hrang hrang a huam niin sawi a ni baw k a, helai budget speech-ah pawh hian. Chuvang chuan, Pu Speaker, dah tam theih deuh a tulin ka hria a. Tin, *hand-holding policy* chhungah hian ‘beneficiary-wise in family-oriented anga kalpui tum a ni em’ tih te pawh hriat a chakawm hle a, chutiang anih phe i chuan, ₹200 crore chu kan indaih lo hle ang tih ka ring a ni.

Tin, healthcare scheme atana vaibelchhe ₹20 dah hi a tlem deuh em aw ka ti a. He sawrkar thar a rawn pian khan, ‘*healthcare scheme tha-mi*’ din turin kan intiam a, sawrkar hmasaah pawh hei aia tam daih hi dahin kan inpe a ni. Tun sawrkar hian sawrkar hmasa aia tha zawka kalpui kan tum laiin, healthcare scheme-a ₹20 crore lek dah hi, a beitham deuh em aw tih ka rilrua awm kan sawi duh baw k a ni.

Pu Speaker, ka zo tep a. Thlai-thar leina tura cheng ₹110 crore kan daha kha ‘engtin nge hman zui a nih tak’ tih hi ka rilruah a awm a. Vairengte-ah phe i chuan tunah hian hmunphiahin rate a nei tawh lo a ni. Kan RR Associate te kan dem ta si a, ‘anmahni thiam loh a ni’ kan ti a; tunah khuan leitu nei lovin kan awm ta a, kan hmunphiah a chhe vek mai dawn ta a ni a. Khulai Bagha leh Lailapur vela rawn lei thinte pawh hian rawn lei an tum ta si lova, tun dinhmunah leitu kan hmu ta lo a ni. Chuvang chuan, he ₹110 crore D-A-H a kan daha hi, thali-thar leina tur atana kan dah a ni baw k a; tun sawrkar hian heng – sawhthing te, hmarcha te leh thildang tunah hian kan buaipui a la ngai lo baw k a. Chuvang chuan, hmunphiah-a harsatna tawkte chhawmdawl na tur atan hian pawisa hi ruahmanna siam ngei thei se thain kan hre baw k a ni.

Pu Speaker, hei sawi tur a tam khawp mai a, (**Hon. Speaker:** minute 3-in a pel ta e.) ka sawi duh bera chu - Budget bu-ah hian tha tak takin kan zia k a, budget ropui tak, mahse a taka kalpui harsa a awm thin a. Chuvang chuan, kan sawrkar hi, he budget bua ngaihnaawm tak leh tha tak inziaka hi a taka a kalpui ngei theihna turin duhsakna kan hlan a ni e. Ka lawm e.

**HON. SPEAKER** : A lawmawm e. Tinah chuan, Mamit Bialtu, Member zahawm tak Pu H. Lalzirliana ilo sawm ang.

**PU H. LALZIRLIANA** : Pu Speaker, ka lawm e. Vawiinah kan Chief Minister zahawm tak (Finance Minister ni baw k) ina 9<sup>th</sup> Legislative Assembly-a kan budget hmasa ber a rawn pharh sawihona hun kan nei hi a lawmawm ka ti a. A thu hi ka han chhiar ka han chhiar a, tin, youtube-ah te upload a ni a, ka zing-walk pah tein kan ngaihthla a, a ngaihthlak a nuamin, a thu a tha a; a present-tuin a present thiam baw k a, a thuah hian chen a awl hle a ni.

He budget-ah hian kum dangte anga kan budget pharh thin aia danglamna features tlema zawng awmte tarlan ka duh a –

A pakhatnaah chuan, Tar-pension (old age pension) han tihpunna hi a percentage pawh a sang hle a; heta tan hian ₹30.5 crores pawh dah a ni a. Tin, thali-thar leina tur ₹110 crores bakah healthcare society te, hand-holding te, road & bridges maintenance PWD hnuaiah dah te, state road bikah te leh bridge han repair-na leh maintain-na turte dah a ni a. Hetiang tak hi budget-a kan hmuh ngaih loh; tin, ‘hydel re-generation infrastructure’ tih te; link road tih te; ruang phurhna Social Welfare Department hnuaia dah te; tin, ‘Gender Budget’ tih te kan hmu a ni. Heng hi kum danga budget speech vela kan hmuh ngai vak loh te an ni a; hengte hi thil thar niin, a tha hlein kan hria a ni.

Kan budget hi keini ang Mizoram State-ah chuan budget ropui tak pharh hi a theih loh hrim hrim a. Kan hriat ang khan, kan budget han neih ve ang angte nikuma kan BE atanga a punna hi 0.49% chiah a ni a, kan ngaihthlak tak ang khan, revenue expenditure-ah hian 82.97% a kal thawt mai a; capital expenditure ah hian 17.03% chiah kan lo nei ta a. Hetah hian kan revenue han tihsanna tura ruahmanna kan han neih te budget receipt ah hian chiang takin kan hmu a. State’s own tax Revenues-ah hian nikum BE aia 21.03% a sangin kan dah a; tichuan, State’s own non-tax Revenue-ah hian nikum BE aia a sanna 25.12% kan han dah a; tichuan, State-own revenues pumpuiaah nikum BE aia kan sanna tur hi 20.89% a ni.

Hetah hian kan State’s own Revenue leh State’s own non-tax Revenue-a sanna tur atana kan han tih, lian pui puite zingah chuan State’s Good & Services Tax (SGST) ah te, Stamp & Registration Fees te, Excise-ah te, Vehicles Tax-ah te a ni tlangpui a, a neuh neuh chu a awm tak nain. State’s own non-tax Revenues-ah hian, kan hriat ang khan 25.12% in hetah pawh hian san tir kan han tum a, heti laia kan hmuh ‘Police’ ah hian 100.7% ngawt mai hemi kan revenue lak tur hi a rawn sang chho a, ‘hei hi khawia tangin nge generate kan tum’ tih hi ka hrethiam lo ang reng khawp mai a; mahse, a rawn lan dan a ni a.

Power & Water Charge ah hian a sang bawk a, 36.8% kan han ti a. Tin, ‘Mining’ tih velah hian 3 crore (absolute number-ah chuan) tihpun kan han tum a, chu chu 25% a ni. Tin, Civil Aviation-ah te chuan kan State’s own tax Revenue atanga kan generate tur a ni a. Hetah hian Stamp Act kha chu kan han pass ta a, House-ah; huaisen takin kan sawrkar lam ten an han ti a. Tin, mipuite pawhin kan thlawp turah ka ngai a, mipui hi a pawimawh ber a. Kan sawi tak ang khan, *At the end of the day*-ah chuan mipui bawk hi an ni leh thin a. Chuvang chuan, heti lai kan State’s own Revenue kan generate-na tur pawh hi kawng leh lamah chuan, ‘kan chhiah lak kan tipung lo ang,’ tih te kha a awm bawk si a, amaherawhchu a pun hmeh riau hian a lang bawk si a; heti lai hi hriatthiam a har deuh hlek a. Kan sawi ang khan, mipuite’na kan tlin tawk leh a tha ber hi kan ti tur a ni a.

Tin, heti laia ‘Devolution of Central Taxes and Duties’ hi chu 15<sup>th</sup> Finance Commission tena kan chan tur an rawn siam kha a ni mai a. Revised Estimate aiin 8.13%-in kan ngah dawn a, Grant-in-aids erawh hi chu kan han dah hniam deuh ta a ni a.

Tin, heta ‘Capital Receipt’ kan han tihah hian, kan sawrkar te pawhin kan han sawi pawr ang reng viau lai – “puk vak hi kan tum lova - *year of consolidation*-ah kan hmang dawn a, project lian pawh kalpui kan tum lova; tun hun chhung hian kan leiba han rullhna te leh hetiang han insawhnghehna hunah hian kan hmang dawn a ni”, kan ti a. Heta Capital Receipt-ah chiang taka rawn lang chu, kan loan lak tur ang ang - Market Loans NABARD funding te, NCDC, REC, UIDF, SIDBI, UBI atang tea kan lak tur hi ₹1482 crore a ni a. Kan loan lak tur hrim hrim hi chu a tlem lo a ni; ₹303 lakhs ngawtin a figure phei chuan a tam zawk nghe nghe a. Chu chu nikum BE nen phei kha chuan .2%-a sang a ni. Heta rawn lang hniam ta em em laia chu – ‘ways and means’ kan tih, nikum BE-a ₹1000/- crore rawn langa kha, tun BE-ah hian ₹3 lakhs a lo ni ta a, chu chuan hetah a bottom line-a absolute figure kha a tihnam ta duai a ni. Kawng leh lamah chuan kan hriat angin, *Ways and means* hi budget pawh a ni chiah lova, a tul anga sawrkarin a puk, chumi chhunga a rullh leh mai thina kha a ni a. Kawng lehlamah chuan sawrkar hmasaah khan hetiang thil ni thei tur a lo nih si avang hian, an lo daha hi ‘a transparent viau zawk em’ tih te ka ngaihtuah mai mai a; hetia an lo dah ngata hi. Kan han kal kan han kal chho ang a, RE ah hian nakinah a figure hi a rawn lang ve nual lovang tih hi sawi a har vena chin a awm a.

Engpawh ni sela, tun hunah hian hei hi a figure han tihnamtu chu a ni mai a; a loan hrim hrim hi chu kum dang aia kan lak tlemna tur a awm lova; nuai ₹303 ngawtin a number phei chu a tam a ni a. Thil hi, a tha e. A chang hi chuan, *sawi loh ang nih leh sawi ang nih leh* te a insul pel nul nul dawn ni tein a lang deuhin ka hria a. Kan Finance Minister-in budget speech a open remarks a rawn tih, Pu Speaker, i phalnain kan chhiar lawk ang a, point hnihnaah hian - “Pu Speaker, kan state GDP hi hripui len lai khan tlema zawng a tlahniam tih loh chu, harsatna tam tak karah a thang chho ve zel a. Kum 2022-23 chhunga kan economic thanna chu 10.14% a ni a. Kum kal mek 2023-24 chhung hian 10.55% than kan inbeisei bakah, kum thar 24-25 chhung phei chuan 11.03% a than theih kan inbeisei mek a ni,” a ti a. Kan GSDP pawh hi alo thang a ni. Khawilai emawah kha chuan -9 te kha kan thleng a ni” tih, khawi lai lai emaw sawina te kha a awm a ni. Amaherawhchu, heti laiah hian a rawn chiang a, a lawmawmah ngai ila.

Tin, kan han sawi ang khan, kan budget bakah kan priority-ah te pawh kan han dah, *100 days agenda*-ah te pawh kan han dah hial – ‘thlai thar leina’ kan han tih a bik takin, ₹110 crore kan han dah te, vawiinniah kan member thenkhat ten an han sawi tawh ang khan, kan mamawh em em lai chu, tun hun hi a ni dawn lawm ni? Kan hmunphiah chingtute’n beisei taka an lo thlir, “kan sawrkar thar chuan kut-hnathawktute min ngaihsak dawn” tia an lo nghahhlelhna kha, tunah hian a dang hmanna tur a la awm hrih



chuang lova; sawhthing lei ala hun hek lova; hmarcha lei tur a la awm hek lova; aieng lei tur ala awm hek lova. Chuvangin, kan sawrkar hian tuna a neihsa ang ang hian, ‘heti lutuk lo deuh hian han tih sak dan a awm lawm ni’ tiin mipui thlavang han hauh takin; hei, kan bialah te pawh hian a chingtu tam tak an awm a. Mamit District leh Kolasib District bakah Tuichawng lam te saw a chingtu tamna area ni tein kan hria a. Tunah hian kan mi leh sate tam tak an thlabar viau a ni; an lungngai a, a kaw tawpah an awm a ni.

Pu Speaker, he kan budget hi *in-principle* chuan a tha a, budget dangdai tak a nihna chen te pawh a awm a; thil thar tam tak hmel han hmuh tur te pawh a awm a, a lawmawm ka ti a. Chuvangin, tha taka kan budget-ina min kaihhruai a tum anga kan kal chhoh theih hi kan duhthusam a ni e. Ka lawm e.

**HON. SPEAKER** : A lawmawm e. Tunah Thorang Bialtu, MLA zahawm tak Pu R. Rohmingliana ilo sawm ang.

**PU R. ROHMINGLIANA:** Pu Speaker, a hmasa berin, tun sawrkar tharin budget hmasa ber a rawn pharh thei leh sawi chhuak thei tura a rawn chhawp chhuak thei hrim hrim hi, tun sawrkar thar ka lawmpui hmasa ni sela.

Pu Speaker, he Budget, 2024-25 ah hian thil tam tak a tha hmuh a nih laiin, mak han tih ve deuh deuh lai te pawh ka nei ve a. Helai budget, kan Leader-in a rawn pharhnaah te pawh hian uluk taka han chhiar chuan, thil thaawm taka lang, ‘mahse’ han tih laia kha thil tam tak awm theiin ka hria a.

A hmasa bera ka sawi duh chu, (hun a tlem si a, a point-a ka kal mai loh chuan) he budget-ah hian hun danga la awm ngai lo - *Gender Budget Statement, 2024-25* kha a lo lang nawlh mai a; hei hi a ni a. Hetia han en chuan, thil thar niawm taka lang a ni a. ‘Gender’ han tih chuan, mipa leh hmeichhia kha a kawh a ni mai a. Amaherawhchu, he gender budget statement-a ‘*hmeichhia*’ bik laia kha, an hamthatna tur leh eng emaw a inziak a. Hei hi a hranin han awm ni mahsela, tun sawrkar liam taah pawh khan hetiang tho hi thil tam tak tih a awm a ni. Phek 5-naah khan thil tha deuh ka hmuh chu, ‘Physical self-defence - Hmeichhe tan’ han tih te a awm a. He gender budget-ah hian School Education bakah Social Welfare leh Home lamin an la deuh dawn niin a lang a.

Tin, mipa te mamawh loh, hmeichhia te mamawh thil tam tak a inziak a, kalpui mek pawh a awm a ni. Hemiah ngei pawh hian, tuna ka sawi ang khan *self-defence* ang chi pawh kha Samagra lam te pawhin an kalpui mek a, Mizoram Amateur Taekwondo Association pawhin school naupangte an lo zirtir thin a, a tha hlein ka hria a; thil awmsa kha hetah hian a rawn inziak lang leh ni maiin ka hria a. Heng te hi kal thui pui zel ni sela a tha hlein ka ring a. Kan Mizo hmeichhiate, a bikin zirlaite pawh vai ramah te an

kalin, self-defence an lo zir chuan, tangkaipui na tak tak an nei thei a ni. Helai hi ka han fak ni ta sela.

Tin, pakhat lehah chuan, kan session hmasaa ka sawi angin, a fak ngai lai chu ka fak mai dawn a; amaherawhchu, 'sawisel ngai lai chu ka sawisel dawn a ni' ka tih tawh ang khan, Pu Speaker, he budget-a lo lang, tha ka tih leh deuh chu - Mitthi ruang phurhna chungchanga ₹5 crore lo lang hi a lawmawm ka ti a, tha ka ti hle mai. He budget pharh hma pawh hian kan bial chhungah chuan mitthi eng emaw zat kan thawn tawh a ni; a buaithlak duh khawp mai a. Amaherawhchu, chumi rual erawh chuan, a guideline hi uluk taka siam ni sela a thain ka hria a; a guideline a that loh chuan inhnial buai theihna lai tam tak a awm tho mai a.

Hmanniah ka bial chhung Putlunga-sih khua chu Lunglei damdawiinah a awm a, an beidawng a. 'A damlai hian phur thla mai rawh u' an ti a, ambulance kan hire sak a. Tichuan, a thleng chiah a, a chatthla a. Khatiang chi deuh - thlen hmaa chatthla te pawh kha, 'a khawi chin nge a huam dawn' tih ang chi ah te guideline tha tak awm turah te pawh ngai ta ila. Pu Speaker, ka han sawi tel duh chu, hei, tukin zingah pawh ka bial chhunga mi damdawiina awm ngei te an lo kal a, tun dinhmunah hian golden card an hmang thei lova, an buai khawp mai. Golden Card an hman theih loh avangin damdawi leina an nei lawi si lova; khatiang chi te pawh kha, health lam kan sawi laiin ka han sawilang tel ni sela.

Thildang lehah chuan, Pu Speaker, tun sawrkar thar-ina flagship programme an rawn duan 'hand-holding' tih hi, mipuiin kan lo thlir thup a. A nihna takah chuan, he 'flagship programme' tia in rawn tarlan hi Pu Speaker, sawrkar liam ta leh a hmasaah pawh flagship programme ah chuan, a hming a dang a ni mai a, 'hand-holding' vek a ni; SEDP te, NLUP te pawh 'hand-holding' vek a ni. Tun sorkar thar hian Pu Speaker, 'hand holding - ban a kaih' an tih hi a hming dang an thlak dawn nge ka hre lova, tunah chuan, 'hand-holding' an ti tawp a, hetah hian crore ₹200 chiah dah a ni hi mak ka ti a. Mipuiin kan lo beisei em em, he sawrkar thar lo piang tur kan beiseina thingtlanga mite'na kan lo beiseina lian tak mai ah ₹200/- crore chauh dah an ni mai hi a lungchhiatthlak ngawtin ka ring, kut-hnathawktute tan. Sawrkar hmasain SEDP sum a hnutchhiah ringawt pawh ₹150/- crore a ni a, tun budget atana ₹200/- crore dah an ni hi chu, nakinah budget kan han en zel ang a, 'kei chuan a tlem ka ti khawp mai' tih laia kha ka han tarlang duh a.

Tin, SEDP hman bang ₹150/- crore atanga ₹110/- crore kha thlai-thar leina atana dah anga sawi a ni a. Tichuan, a dang ₹40/- crore kha health lamah leiba rulhna tura dah niin a lang a. ₹110/- crore, thlai-thar leina atana dah ang chi te pawh kha tunah hian engatinge kan hman mai loh aw? A chhan chu, kan House Leader-in helaiyah a sawi tawh a; kan minimum support price-ah 'hmunphiah ro chu ₹100/- ani ang' a ti a, lawmawm ka ti. Sawrkar hmasa liam ta season hnuhnung berah, ka bial chhungah chuan

₹105/- atanga ₹135/- thlengin, chutiang chuan hlawk takin an hralh thei a. Tun hunah chuan hmunphiah ro hi ka bial chhung Tuikawi-ah te khuan a tam em em a, tunah hian kg-ah payment-in ₹50/-, a bain ₹70/- a ni. Minimum price ah ₹100/- dah a nih si chuan, heng sum hmang te hian, anih loh pawhin kawng dang lo pawhpenin ‘₹100/- tal chuan lei theih sela’ tih laia kha, wawiinah hian ka han tarlang ve leh duh hrim hrim a.

Tin, Pu Speaker, he budget ah hian ₹20/- crore chauh healthare-ah dah a ni a, sawrkar hmasa hman bang ₹40/- crore erawh a la awm thung a; chung te chuan kan inchhanchhuak zo ang em kumin chhung hi? Ngaihtuahna a ti thui khawp mai.

Tin, Pu Speaker, a lawmawm lam han sawi lawk ka duha chu - NSAP hnuaiia kum-upa zawkte pension scheme chungchang kha kan thiante, kan hotu pawimawh tak takte, member zahawm tak tak te’n an sawi ang khan, mi pakhat ah ₹100/- zelah ₹1000/-a tihpun lai hi tha ka ti hle mai, budget a lo lang hi. Chuvang chuan, he budget hi helaiah hi chuan ka support a.

Tin, Pu Speaker, hei hi a budget bu dik tak zawk chu a ni a; Annual Financial Statement, 2024-2025 hi kan budget bu dik ber zawka chu a nih hmel a, heng lehkha tam tak zingah hian. Hetah hian GDP thang chho hret hret anga lang, kum 2022-2023 aia kum 2023-2024 a sang hret tura ngaih ni mek te leh, tun 2024-2025 ah sang leh hret tura beisei, hengte hi a rawn inziak lang a; tha ka tiin, a lawmawm pawh ka ti a; kan House Leader thuchah ah pawh khan an rawn ziak lang a. Hei hi thleng ngei ngei sela kan sawrkar tan chuan a duhawm hle a. Amaherawhchu, Pu Speaker, ka sawi tawh ang khan hemi thleng tur chuan kan thlai-tharte kan hralh that a ngai bawk si a. A hralhna a man a to mang si loh chuan kha thil kha a thleng lo mai ang tih erawh chu ka hlau hle a ni.

Tin, Pu Speaker, a dawt lehah chuan, State sum tel miah lova Aizawl by-pass tunnel ₹1313.38 crore an rawn sanction tih kan House Leader zahawm takin helaiah a rawn sawilang tawh a; hei hi lawmawm ka ti, ka lawm khawp mai. Hei hi project a ni a, Zoram mipui pawh hian hria se. Mizo mipuite hi kan hmanhmawh em em a, project pakhat rawn sawi chhuah hian ni nghal zung zung turah kan ngai a. Hei hi a han kal ang a, he project hi rei tak a kal a ngai dawn a ni, a siam chhung kha. Chu chu Mizoram mipuite pawhin kan hriat a ngaiin ka hria a, kan lo dawhtheih ve viau a ngaiin ka ring. Chumi rual chuan, he project Aizawl by-pass road hian Aizawl khawchhung traffic jam eng emaw chen a solve dawn niin a lang a, lawmawm ka ti a. Hei hi sawrkar hmasa MNF sawrkarin bul a lo tan engkim a lo tihchhuah tawh kha, tun sawrkar thara sanction a ni hi lawmawm ka ti.

Tin, Pu Speaker, point dang lehah chuan, power generation roof-top leh a behbawm atan ₹20.1 crore lo lang hi a tlem ka ti hle mai. Pu Speaker, transformer repair-na turte leh thil dang dang, LT line te khang rooftop solar atan te hetiang lek dah hi a lungchhiatthlak ka ti a. Roof-top solar te hi hetah hian dah tam ni se la, in chungah te

hian rooftop solar system a tam thei ang ber te hi subsidise sela power kan leina te hi a solve ngeiin ka ring a.

Tin, P&E Minister zahawm tak khan hydel project pahnih tun term chhunga siam a nih turn thu kha a sawi a. Amaherawhchu, tun budget-a an dah dan en hi chuan bultanna tun kumah hi chuan a awm dawn miah lo niin a lang a, tun kum atanga kan tan loh phei chuan 'engtin nge ni ang' tih laia kha rilruah a lian hle mai.

Pu Speaker, point pakhat ka han sawi leh duh chu - kan budget bu ah hian a lang chiang em em mai a, a technical ka sawi seng si lova; fiscal deficit chungchanga hi 2023-2024 ah -124720.73 a ni a hei chu estimate a ni tih pawh kan hria a; RE ah chuan a rawn sang chho ngei mai a, loh theih loh a ni hei hi chu. Chumi rualin tun 2024-2025 ah hian -136570 daih a ni. Chuvangin, 2023-2024 aiin 2024-2025 ah hian fiscal deficit tur hi a sang zawk daih, tun dinhmunah chuan. Amaherawhchu, RE te a rawn chhuak ang a, hetah hian kan sum hman dan te kan thiam dan azirin a tlem thei bawk a. 'Year of consolidation' kan tih rual hian, tun budget hi kan hman thiam loh chuan leiba hi pung thur theiin a lang tlat a. Chuvang chuan, helai atanga han en pawh hian thil tam tak kan hman thiam loh chuan thil pawh thei a la awmin ka hria a.

Lei dawh leh repair-na tura ₹140 crores han dah ringawt te kha, a va han tlem teh reng em! Kan kalkawngte hi vairam kalkawng ang a nih loh chin a awm; kan lei te hi nghet lo chin a awm; kan lung leh kan hmanruate pawh hi a tha lo chin a awmin ka ring; repair zung zung ngai te a awm si a. Chuvangin, repair-a kawng tha nei tur chuan, PMGSY sum a lo lut a, Mizoram-ah, minor bridge te, hume-pipe te, culvert chi hrang hrang 1, 2, 3 te pawh a awm ang. Amaherawhchu, major bridge hi phal a ni si lova, PMGSY-ah, khangte kha hetiang 140 crores ringawt atang chuan siam theih ngaihna a awm dawnin a lang lova, pawh ka ti hle mai a.

Amaherawhchu, Pu Speaker, a tawpna berah chuan, he budget hi kan lo en ang a, he budget kal ang hian mipui vantlang ina thingtlang lamah te pawh 'kan lo beisei ang kan hmu ang em; kan hmu lo ang em' tih laia kha uluk takin kan lo thlir ang a. Tichuan, tha taka sum hman a nih chuan, beiseina sang tak pawh a awm thei a, thingtlang hnathawktute thleng pha erawh chu a tlem hlein ka hria a, a pawh ka ti hle a ni. Pu Speaker, ka lawm e.

**HON. SPEAKER** : A lawmawm e. Lunglei West Bialtu, Member zahawm tak Pu T. Lalhlimpuia ilo sawm ang.

**PU T. LALHLIMPUA** : Pu Speaker, ka lawm e. Vawiinah hian budget vawikhatna pharhtu sawrkar ten kan Finance Minister leh kan Chief Minister ni bawk Pu Lalduhoma kaihhruaina hnuaia budget mumal tak, kalphung tharin mipui budget kan han pharh thei ta hi a lawmawm ka ti em em a. Kan session tan tirha kan Larsap-in

speech a neih khan mumal takin he kan sawrkar kalphung tur hi a rawn sawi tawh a. Chu kalphung tur zulzui chiah chuan kan CM-in budget speech a nei hi a inzawlin, a inpha mar hle a ni.

Governor Speech-a lo lang chu - kan CM-in budget a rawn pharh atang hian, thu, tisaah a lo chang mek a ni a. Pu Speaker, sawrkar hmasa leh tun sawrkar budget khaikhinna ri va hi a tam mai a. Tin, he House zahawm tak chungah pawh kan Member zahawm tak tak te'n chung te pawh chu an tarlang mek a ni a. Vawiinah hian revenue expenditure leh capital expenditure chungchangah he budget hi nikum leh kumin te pawh khaikhin a ni a, percentage ratio angin tehkhin a ni a, 82:17 tih te, 78:22 tih te khan kan han khaikhin a.

Vawiinah hian han tarlan hram ka duh chu - thil nih ang tho tho, ni sa leh ni thei reng, hmai tih hmelthatna turin nula ten theihtawpin make-up an beih ang mai hian, sawrkar hmasa te khan make-up nasa tak hi budget-ah hian an lo hnawih thin tih hi tun budget thar atang hian a langin ka hria a. *Kalphung-thar* anih ang chiahin, vawiinah hian kan Finance Minister zahawm tak hian he budget thar a pharh a tang hian a nihna ang chiah chiahin a rawn lang chhuak ta a ni. Capital Expenditure-a achieve sawi tur awm chuang si lova, a chutney atan revenue expenditure indaih lo sa daha, make-up chhah zawka chulh thin a ni tih pawh hi he kan budget thar a tang hian a chiang hle a. Actual Budget, 2022-2023 leh Budget Estimates a awm a, Revise Estimates a awm bawk a. Revise Estimates hi Actual Budget anga ngaih theih a ni bawk a. Chuta tanga han zir chuan, vawiih hian kan budget hmasa te hi, 'make-up chhah tak an hmang a ni' tih hi a langin ka hria a ni. Meng renga hai tir tur hian hmai phih tir hi kan ngaiin ka hria a. Vawiinah hian he sawrkar thar hian kan budget-ah hmai phih tharin, a lan dan dik takin a rawn pharh niin a lang a ni.

Amaherawhchu, heti zawng hian han sawi ta ila - ADC budget pek tur te pawh nikum lamah chuan an tarlan danah khan re-appropriation a tihfel leh tur ni ngeia hriatin, tling lo sa te pawhin dah a ni a. Kumin revised budget kan hmuh ang khan, heng Autonomous District Council-te pawh dah belh ngei ngei ngai a ni a. Tichuan, kan revenue expenditure leh capital expenditure chu a hmel a lo mawi ve a, a percentage difference te pawh a hmel a lo nalh ve deuh a. Chutiang zawnga khaikhin chuan, vawiinah hian he budget hi kan hmuh thelh deuh niin ka hria a. Actual Budget a chan hunah a positive lai hi chu kan hmuh ngei ka beisei a ni.

Pu Speaker, kumin 2024 hian kan Finance Minister speech ang khan, sawrkarina hman bang kan rochun kha cheng -389.89 crore-in bul kan tan a. Economic sector atanga Mizoram economy than dan tehnaah, kan Finance Minister (kan CM ni bawk) in service sector ho ina hnuhma an neih len dan te a sawi a.

Tin a dawttu Industrial Sector a ni a. Mizoram-ah chuan kan hria a, cottage & small-scale industry te tein a contribution kha a ni a, Mizoram economy contribution-ah chuan pahnihna a hauh thei a ni. Tichuan, a hniam ber pathumna hi agriculture sector a ni a, hei tak hi sawrkar tharin a hmu sain, kan budget te pawh lian taka a dah hi a lawmawm ka ti a. Vawiinah hian he House zahawm tak leh mipui thlirtute pawhin beng lo chhi se ka tih chu – kut-hnathawktute hnena thleng pha budget siam hi a lawmawm hle a ni.

Sector pathumte'n GSDP an contribute dan han en hian Mizoram tana thil lawmawm em em chu, agriculture sector lamah sorkarin budget lian tak ₹110 crore dah anih bakah ₹210 crore dang dah belh leh a ni a, vawiinniah hian duh khawp dah theih ni se, tih a ni ngei ang. Nimahsela, negative balance la chhawngin; sorkar tan chuan budget a leng rih lo a ni ber a. Vawiinah hian he sawrkar ina a tum chu - *Year of Consolidation* a ni a, chuang chuan, kalpui loh theihloh a nihna lai, he budget thatna lai hi he House zahawm taka memberte hian kan hriat a tul hlein ka hria.

Pu Speaker, chuti lai chuan, kan hma hun hi heti zawng hian sawi ta ila – Market forces, a bik takin thil man siamtu chu mipui duhna, an lei tur leh bungraw awm zata zirin a mahin a insiam a. Support price te leh control price te chu awm tho mahsela, agriculture - a thawhchhuah tur inngahna bikah hian thil fail thei tam tak a awm a. Vawiinah hian thli leh ruah te khawchin te hian kan thlai thar hlawk leh hlawk lo hi a tifiyah hle a ni. Chuti chung chung chuan kan CM, kan Finance Minister-ina *Year of Consolidation* ni chung a, he budgeta hetiang ang dinhmun a han pharh ngam hi a lawmawm ka ti a. Member zahawm tak ten a tight a ni tih pawh an sawi reng a; chutih lai chuan market forces siamtute hi khawvel thil tamtak a awm. Chutah chuan, State Day-ah khan kan CM kha bawh khupin a tawngtai a ni; chu tawngtaina rinchhan chuan vawiinah hian he budget hi eng emaw chenah chuan pharh a nih hi a rinawm a. Vawiina hian helaia House member-te leh mipui thlir mektute hnena kan ngen duh chu -Kristian ram kan ni a, budget tihlawhtling tur hian tawngtaina nena sawrkar thar hi min thawhpui a tul ka ti em em a, chu chu kan tarlang hram a ni.

Pu Speaker, kum kalta mek current price atanga kum 2024-2025 GSDP crore 4837.52 a chhut kha a ni a. Kum kal mek RE budget kha nichina sawi tawh ang khan, Actual Budget tluka ngaih a ni a. GSDP kha Crore ₹3955.69 a ni a, a punna tur hi crore ₹8,681.63 a ni a.

**HON. SPEAKER** : Lawk aw; khawngaihin, chawhma hun dar 1 a ri a, a zova. Member zahawmtak hian a sawi laklawh si a kan sawi zawh law law tir dawn em mi ni ang? (*House-in a remti a.*) Aw, han sawi zo law law rawh le.

**PU T. LALHLIMPUA** : Pu Speaker, ka lawm e. Chutiang chu a ni a; a punna tur beisei hi crore ₹8000 chuang a ni. Vawiinah hian hetiang hmu lawk tur hian ngaihtuah lawka, estimate beisei bawh tur hian kan CM Finance Minister budget hi a

ropui ka ti hle a. He punna tihlawhtlingtu tur mipui leh sawrkar kal mek hian ‘engnge a phenah awm’ tih kan ngaihtuah a ngai a. Chu a phena thil awm tur chiang em em chu - corruption hi a leng dawn lo a ni. Sawrkar hnathawk leh mipui te hian tun budget tihlawhtling tur chuan Finance Minister-in budget a pharh hi thlir tlang ila, kan tih tur leh tih loh tur te kan chian a ngai hlein ka hria.

Pu Speaker, i remtihain - Finance Minister Speech hlawm thumnaah hian thil kan hmuh langsar em em chu - Financial year 2023- 24 a gross fiscal deficit cheng ₹1247. 21 niin, a la pung chho deuh deuh tura thlir mek a ni a. Tichuan, a zavaiin crore ₹1365.70 a ni a. Kum 2023-24 chhunga GSDP atanga chhutin, budget estimate-ah khan 3.47 a ni a, revise estimate-ah khan 4.73 a ni. Nimahsela, hei hi kan CM - kan Finance Minister hian tun kum kal tura budget-ah hian 2024-25 ah hian Budget Estimate ah 2.84 percent a khung a tum hi ropui ka ti hle mai a. Kan CM hian kan economy than dan tur leh kan budget kawng hrang hranga tihlawhtlin a nih dan tur head hrang hrang atang hian a hmuh thui zia leh a hmuh ril zia hi a chiangin ka hria a Chuvangin, he budget hi a rintlak in ka hria a ni. Tin, i remtihain Pu Speaker, amah pawhin nangmah a address hialna che tawngkam pawh hi a lawmawm ka ti a; i phalnain, heti hian a sawi a nih kha - “Pu Speaker, ka sawi tel duh chu, GSDP hi projection mai a la ni a, danglam leh thei reng a ni e,” tiin. A hmuh thui em em rualin, fimkhurna tur tamtak hi a awmin a lang a. Chuvang chuan, projection a nihna te pawh hengah hian a rawn sawi a; a wording tin hi han thlir hian a mai mai lova, ‘awmze thui tak; sawi thui tak a nei a ni’ tih hi a chiangin ka hria.

Chungte chu kan budget chungchangah (thil tamtak sawi tur a awm na chungin) ka han tarlan ve theih chu a ni e. Ka lawm e, Pu Speaker.

**HON. SPEAKER** : A lawmawm e. Hei, kan chawhma hun a tawp ta a, kan chawl ang a; chawhnu dar 2-ah kan chhonzawm leh dawn nia.

(*Recess*)

**2:00 PM:**

**HON. SPEAKER** : Kan House Leader (Finance Minister ni bawk) Pu Lalduhoma, Chief Minister zahawm takin, “*The Annual Budget for the year, 2024-2025*” a pharhah general discussion kan nei mek a ni a. Tunge han sawi ang le? Champhai North Bialtu zahawm tak Pu H. Ginzalala ilo sawm ang.

**PU H. GINZALALA** : Pu Speaker, kan Hon. Finance Minister budget pharh hi ka chhiar ka chhiar a, a tha ka ti khawp mai a; sawi tur pawh a tamin ka hria a. Tuna kan dinhmun hisap hian, thil ropui tak niin ka hria a. Hei bak hi chu tihhleitheih a niin ka ring lova, budget tha tak kan pharh niin ka ngai a. A tak tak ram a rawn ziakin ka

hria a, budget hi a realistic khawpin ka hria. A budget speech hi a transparent hle a, kan nihna tak tak a rawn pholang hlein ka hria a ni.

Pu Speaker, member dangte'n an sawi tawh ang khan, budget dangah hian manipulation hi a awm thinin ka hria a. Tun tum chu khatiang kha awm lovin, a nihna ang angin a lang a, hei hi a budget a quality-na niin ka hria a, a quality hi a sang ka ti a, lawmawm ka ti a.

Tin, budget pharh reng reng hian (ram changkangah pawh a ni vek a) prioritised sector an nei ngei ngei a ni. A bik takin keini ang ram retheiah pheih chuan thil tul tak a ni a. A chhan chu, kan resource neih a tlem a, a bei tham a, chuvangin, eng sector emaw hi kan prioritise a ngai thin a ni. Tunah pawh hian education lam te, health sector lam te hi budget-ah hian a rawn prioritise deuh niin ka hria a. Hei hi hmasawn duh chuan tihdan tlangpui a ni a, a ropui ka ti a ni.

Hei hi, han zir chiana thil ropui tak nia ka hriat chu, kan economy thanna tur hi 11.03% angin a rawn lang a ni. Hei hi kum hmasa 2022-2023 ah khan 10.14% niin, tuna kan kum hman mekah hian 10.55% a ni a, kan economy thanna pawh a hrisel thain, duhthusam a ni a. Chuvangin, he budget hi budget ropui tak niin ka hria a, lawmawm ka ti bawk a ni.

Tin, kan budget ah hian service sector te, agriculture sector te leh, primary sector lamah pawh service sector te, secondary sector pawh kha a rawn sawilang a. Chutah chuan, service sector hian contribution a ngah ber a, 50% lai a ni. Service sector lai hi *kan future* a ni hrim hrimin ka hria a. Kan ram economy leh geographical condition ngaihtuahin nakin zelah pawh service sector hian contribution a nei lian zel dawn ni pawhin a lang a. Amaherawh chu, thil langsar em em mai chu, nichina kan member-te khan 'primary sector hian contribution a nei hniam ber a ni' tih an rawn sawi lang a, kha kha kan budget hian a rawn prioritise a ni. Tuna SDRP ah hian ₹200 crore allocate a ni a, hei hi agriculture sector bikah hian hman tangkai kan tum viau niin a lang a. Sector tin hi a in balance loh chuan economy hi a tha tak tak ngai lova, economy than dan pawh a hrisel lo thin a ni. Chuvangin, kan hotute'n, 'agriculture sector ah hian primary sector hi a hniam ber' tiin, khatah khan budget allocation pawh a hranga an rawn dah hi kan tih tur dik tak niin ka hria a, lamawm ka ti khawp mai.

Kan budget kal tawh hi han thlir ila, primary sector leh secondary sector te inthlun zawmna *leilawn* hi kan siam ngai lo a ni. Tawng mawi lo ni lo sela, sawrkar hmasa lamah khan linkage kan sawi ngai lo. Mahse, he sawrkar hian *linkage* hi a rawn ngai pawimawh ta a, hei hi thil thar lo lang chu a ni. A awmzia chu - primary sector ah chuan agriculture te a ni a, kan hre vek a, mining leh thil dangte kan nei ve lova. *Entirnan:* sawhthing te pawh primary sector a lo ni a; sawhthing miin a thar a nih chuan, a industry sector-ah a luhpui tur a ni; a nih loh pawhin, service sector-ah a luhpui tur a ni. Khatah



kha linkage a awm thin lova, sawhthing kan thar ang ang leh thlai dangte pawh a ni ang, market a thleng phak thin lo a ni. Chu chu ‘eng vang nge?’ kan tih chuan, khang sector hrang hrang thlun zawmna leihlawn awm thin loh vang a ni. Chuvangin, he kan budget-ah hian thil ropui tak mai kan hmuh tak chu, sector tin thlun zawmna tur a rawn duang hi a ni. SDRP ah pawh hian nichina ka sawi ang khan, ₹200 crore lai te kan dah a, hei hi ‘engnge a awmzia?’ kan tih chuan, secondary sectorah hian skill development te, entrepreneurship te hi develop kan tum a ni; chu chuan primary sector-a kan production awm ang ang – sawhthing, chhahwhchhi, hmarcha etc. te kha industry-ah a luhpui ang a, chutah chuan, market service sector-ah kan luhpui dawn a ni. Chu chu he budget ropuina lai chu a ni a, a lawmawm khawp mai.

A dawt lehah chuan, kan policy hi han chhiara thil ropui tak mai kan hmuh leh chu – ‘*hmasawmna kairual*’ tih tawngkam a rawn hmang a, chu chu, ‘balanced regional development’ te an ti a. Ngaihpaawimawh bik priority sector kan neih rual rualin, a regional ah chuan duhsak bik awm lova, Mizoram dung leh vang chu ngaihpaawimawh a nih vek tur thu a rawn sawi a. Hei hi ram changkangte tih thin a nih avangin, a changkang ka ti a, *balanced regional development* hi kan ram damna tur a ni. Tichuan, thlei bik nei lo kan nihna a lo lang dawn a ni.

Tin, a dawtah chuan ‘resource mobilization’ lam te a rawn sawi kai a, hei hi a ropui khawp mai; kan ramin a mamawh a ni. ‘Resource mobilization chu eng nge ni’ kan tih chuan, sawi tur a tam a. Employment generation lam pawh hi kan thalaite’n an mamawh no. 1 a ni. Kan thalaite hna thawk theia kan siam loh chhung chu, kan ram hi a dam dawn lo. Chuvangin, kan thalaite tan employment kan generate tluka thil tha a awm lova, human resource hi kan mobilise a ngai ta a ni. Kan ramin a mamawh ber chu - thalaite hna thawk theia siam a ni. Chu chu ka sawi thin danah chuan ‘Vibrant Mizoram’ a ni; chu chu a tum niin ka hria a.

Tichuan, SDRP bawh sawi kai ila. Khata ₹200 crore lai kan dah hi skill development lamah te, entrepreneur lamah te kan hmang tangkai dawn a ni. Tin, resource mobilization lam han sawikai leh zawk ila. Kan hotute’n an sawi thin thil pakhat pawimawh em em chu, *entirnan*: electricity bill te, ‘a theih chin chinah kan ba lo ang’ kan ti a ni. Mahse, kan sum dinhmun en hian vawi leh khatah kan ti vek thei lo ang a. Kan tih theih phawta, a hun taka electricity bill hi company lamah kan pe thlap thlap anih chuan, within five days ah 1.5% kan hlep thei a ni. Kan energy consumption zawng zawng ka chhutin, rebate kan claim thei a, energy bill a hun taka kan pek theih ngat chuan, kum khatah ₹7 crore kan hlep thei a ni; a tlem berah chu chu. Tin, a hun taka rebate neiha kan claim theiha, a huna takah electricity bill kan pe a nih chuan, IEX - ‘Indian Electricity Energy Exchange’ an ti a, power trading a ni a, chutah chuan kha sumdawmna kha a luhpui theih chiaah a ni. Pu Speaker, ka sawi laklawh a, min lo hrethiam la. (**Hon. Speaker:** Minute 1 ila nei e.)

A lawmawm e, Pu Speaker, Tichuan, he energy hi sumdawnaah hian kan luhpui thei a ni. Khatia kan luh theih kha chuan (nichina ka sawi rebate-na nena tlingkhawmah) kum khatah crore ₹40 bawr vel hi a hlep thei dawn a ni. Tun dinhmunah hei hi kan ti vut vut thei lo a nih pawhin, kan sum neih dana zirin kan hotute'n policy ah an rawn hmang a. He energy bill atang ringawt pawh hian kum khatah crore ₹40 bawr vel kan hlep thei dawn a lo ni reng mai a. Chutianga ti thei tur chuan kan hotu ten hma an la zel a, energy bill pre-paid te hi an sawi lang tawhin ka hria a, khangte kha ngaihtuahnaah lo awm se la.

Tin, a dawt lehah chuan, tukin lama zawhnaah te pawh kan inzawt a, Land Revenue & Settlement Department angah te pawh a ni tho a, 'outsource theih theih kan outsource ang' kan ti a. Tunah te pawh department thenkhatah engnge kan outsource theih tiin ngaihtuahna an seng niin ka hria a, kha khan thil tam takah resource mobilization hi a siam dawn niin ka hria. Chuvangin, he budget speech hi ropui ka ti a, a lawmawm ka ti a.

Tin, a dawt lehah chuan, *time management* chungchang te pawh kha a rawn sawi a ni. Kan ram weather condition a zirin leh working season te a lo tlem a, fur a lo ni a; chungah chuan, time management hi a pawimawh khawp mai a. Time management kan thiam chuan, development hi a kal chak dawn a ni. Chuvangin, he budget speech hi a ropui a, a tha ka tiin, a lawmawm pawh ka ti a, kan ram economy-ah hian thil inthlak thleng nasa tak a rawn thlen dawn niin ka hria a. Tin, a budget pumpui hi a sustainable a, 'a *environment friendly* em em bawk a ni' tih lai hi ka han sawi duh bawk a ni. Aw le, Pu Speaker, ka hun a zo tawhin ka hria a. Ka lawm e.

**HON. SPEAKER** : Tunah Pi Prova Chakma ilo sawm ang.

**PI PROVA CHAKMA** : Pu Speaker, ka lawm e. I remtihnaah, he House zahawm takah hian kan Chief Minister zahawm takin budget a pharhah khan kut-hnathawktute a ngai pawimawh riauin ka hria a. Chutah chuan kei pawhin chu mi base chuan 'kut-hnathawktute'n engtin nge hma an sawn theih ang' tih te kha ka rilruah a awm a. Chutah chuan, I remtihnaah, Pu Speaker, he budget pharh tak Sl. No 22 hi ka chhiar lawk duh a -

*"Kut-hnathawktute thar chhuah mumal zawk leh hlawk zawka hralh chhuah a nih theih nan Agriculture Minister kaihhruaina hnuaiyah Agricultural Market Assurance Fund Management Board din a ni"* tih lai tak kha a tha ka ti a. Amaherawhchu, a that rual rualin tun thlengin agriculture-ah kut-hnathawktute an hmasawna tur hmunphiah la hralh theih loh te kha engtin nge an tih zel dawn; khami Board kaltlanga an ti thei anih chuan ₹110 crore an dah te kha tun thlengin engatinge an la hman theih loh; engatinge hralh tur an la neih loh' tihte kha ka rawn tarlang duh a ni.

Tin, Sl. No. 25 ah khan, thlai zawrh leh hralhna kawngah te pawh Pu Speaker, I remtihhain, “*Bana kaih policy* kaihhruai department-te chu an scheme leh proposal a zirin sorkarin a tul dan azirin sum a pe dawn a ni” tih te kha a rawn tarlang a. Khatah khanin, Bana kaih - Hand-holding policy te kan ti a, ₹200/- crore chiah a dah a ni si a, ₹110/- crore khanin tun thlengin kan la lei thei lova, tun financial year chhungah hianin an la lei thei lova; ‘₹200/- crore ah hian kum khatah engtin nge hma an lak theih ang;, a tlem si a’ tih kha ka rawn sawi ve duh a nih chu.

He budget pharhah hian thil pakhat ka rilruah a lo awm a, a tha ka tih chu, gender budget-ah hian he sawrkar hian hmeichhiate min ngai pawimawh kha a lawmawm ka ti a, khami gender budget-ah khan keimahni bial bik West Tuipui-ah khan KGBV hnuaia sum dah a ni te kha a lawmawm ka ti a. Amaherawhchu, ‘kha kha a tak takin an kalpui thei ang em’ tih kha ka rilruah a awm a. Gender budget rau rauah pawh khan, ‘general discussion-ah chuan eng pawh a sawi theih’ an tih avangin, ka rawn sawi ve nual a nih chu. Tichuan, tuna problem kan face mek lai Assembly ah pawh hian Hmeichhia bik tan Recess Room hi kan nei lova, chu chu ka rawn sawi lang duh a. Min ngaihtuah sak theih chuan a lawmawm ngawt ang.

Pu Speaker, i remtihhain - Social Welfare Department-ah hian ruang phurhna chungchangah ‘harsa zual bikte tan’ tih kha, khami harsa zual bikte kha engtinngan kan thliar hran ang; BPL document hi an ti tel kher ang em; eng tia tih tur nge? A chhan chu a tam zawk chu harsa tak taka BPL card nei lote pawh an awm mai thei a ni, BPL card nei kher hi an phut ang em tih te kha ka rawn zawt duh a, kha kha a kimchang zawkin han tilang se a tha ka ti a.

Road Construction-ah hian, kan bial hi engtik lai pawhin kawng chhia kan tawh reng a, mahse tun dinhmunah hi chuan tlem hna te hi an thawk niin ka hria a. Kan biala mite ka han phone pawhin tunah chuan kawng te pawh a that thu min hrilh a, a lawmawm ka ti a. Helaia ka sawi duh chu, road construction-a sum dah hi a tlem deuh em? keimahni bial ngawr ngawrah pawh hianin bridge construction - Khawthlang Tuipui ah pawh nuai eng emaw zat khata sum dah kha a kal dawn a. Khalaiah khan, ‘bridge siamna turah khan sum hi a hrana dah a ni na nge’ ti kha ka zawt duh bawh a.

Tichuan, Art & Culture Department-ah hian hmanni lawkah Chapchar Kut kha State-in kan hmang a. Chapchar Kut hi state-festival a ni a; chuti rual chuan, keini Chakma te pawh largest minority ah kan lang ve tho si a, gazette ah pawh kan lang a. Chakma te hian ‘Bizu festival’ hi kan nei ve a, hei hi budget-ah hian a telh ve theih em?

Pu Speaker, he policy hi a tlangpuia han khaikhawm chuan a tha viau turah ngai ila. Mahse, a that rual rualin thil pakhat ka rilruah rawn lang chu - hmanna PRS Training Delhi-a kan neihah khan, agricultural atanga revenue hi kan state hian kan nei tlem ber niin an sawi a, Delhi ah pawh khan a statistic te pawh min hmuh tir a. Hei hi chu a tihsan

theih chuan a lawmawm ang a; amaherawh chu, ‘engtin nge kan tih san ang’ tih kha rilrua ah a awm a. chu West Tuipui bail hi agricultural potential area kan nihna angin thlai thar chi hrang hrang kan nei a, amaherawhchu, kut-hnathawktu ten an tharchhuah hralhna an nei tha thin lova, a chhe mai mai thin a. Chuvangin, thali-thar dah thatna tur cold storage hi kan mamawh hle mai. Kan bial hi ram lum a ni a, thlai tharte a chhe hma ang reng thin a. Chuvang chuan, tun budget ah hian lang rih lo mahse, nakum budget ah chuan cold storage kan neih theihna turin hma te min lak sak se; chu chu kan Agriculture Minister leh Finance Minister hnenah hian ka ngen duh a.

A tawpna ah chuan, old age pension hi cheng ₹100/- atanga cheng ₹1000/- a tihpun tur hi a lawmawm hle. Tin, Home Minister khan hman ni khan hnarua tam tak kan nei ti kha a rawn tarlang a. chutiang a nih si chuan, tuna kan budget hi a tlem tham lo maw tih te ka ngaih tuahnaah a lo lang a. Tichuan, heng zawng zawngah hian tun sawrkarin budget a rawn pharh hi Mizoram tan hmasawna a nih ngei theih ka beisei a ni. Ka lawm e.

**HON. SPEAKER** : A lawmawm e. Aw le, Lawngtlai Bialtu zahawm tak Dr. Lorrain ilo sawm ang.

Pu Speaker, ka lawm e. Vawiin budget session-a thusawina hun tha tak min pek avangin i chungah lawmthu ka sawi a ni.

Kan Finance changtu kan Chief Minister zahawm takin budget langtlang tha tak a pharh hi lawmawm ka ti a, a hmasain Hon. CM chungah lawmthu ka sawi a ni.

State-ina kan thawh chhuah ve tur State’s Own Resources tun kum kal lai meka 22.9% pung chho tura beisei hi thil lawmawm tak a ni a, budget tha tak a ni tih a entir a ni. Tun ZPM sawrkar lakluh a nih khan, ni 100 chhunga hmasawna atana tihhlawhtlin tur, *CM - 100 Days Programme* puan a ni a. Heng tihhlawhtlin tur project tam zawk hi tun sawrkar hian ni 80 vel a sawrkar chhung hian a tihlawhtling tawh a, March Ni 31 ral hma ngei hian ZPM sawrkar hian heng ni 100 chhunga hmasawna atana tihhlawhtlin a tumte hi a tih hlawhtlin hman vek ka beisei a ni.

Tin, CM-100 Days Programme hi tun hma sawrkar kal tawhah khan kan hmu ngai lova; a wawi khatna a ni a. Sawrkar lo awm leh zel turah pawh hetiang thil tha hi chhunzawm theih ni se tha hlein ka hria.

Sawrkar in leiba a neih teuh avangin kum 2023-2024 chu sum leh pai in remchemna kum, sawrkar insawhnghehna atan a puan te, hemi a vanga kan leiba sang lutuk tur tlahniam tur te, hemi avanga kum 2024-2025 a sum puk tur Public Deptt. ₹697.69 crore zeta a tlahniam tur te hian he budget hi, budget tha a nih zia leh, sawrkar hi mipui-sawrkar a nih zia a ti lang Chiang hlein ka hria. ZPM Manifesto leh mipuite hnenah kan

inzawrhna ber thlai thar thlan bik chi 4 te lei nana kan CM-in a tiam ang ngeia budget a dah a ni ta hi a lawmawm ka ti em em a. Hei hian, ‘he ZPM sawrkar hi a tihhlawhtlin theih loh hmanga mipuite hnena inzuar ve mai mai ngai lo, kalphung-thar leh rintlak sawrkar’ anih zia a tilang chiang hlein ka hria. Tin, he hmalakna hian kut-hnathawktute hmangaihtu leh hmakhua ngaitu a nih zia a tilang chiang hlein ka hria.

*Mizoram Resources Management Committee* kan CM zahawm tak chairman-na hnuaiah din a ni a. Sawrkar hmasa khan MRMC hi department a tanga din ni mah se, a hmalakna hmuh tur a tam lo hle a. Tuna kan CM chairman-na hnuaia committee anga din a nih hnu hian, an thil tih tum - sawrkar sum hmanna tih hniam dan tur kawng dap te, sawkar revenue tihpun dan ngaih tuah te, sawrkar hnuaia machinery hman tlak tawh loh tihral leh thawk tute dinhmun zirchian kawngah te hian, tunhma aiin nasa takin hma kan sawn ka ring a, a lawmawm hlein ka hria.

Anti-corruption measures chungchangah kan CM-in inthlan hmaa a lo sawi tawh ang ngeiin, CBI chu kan State chhungah hlemhletna awm ang angte chhui thei turin general consent pek a ni ta a. He sawrkar hian eirukna a huatzia leh tih tak zeta do zia a tilang chiang hlein ka hria. Heng bak ah hian, Mizoram sawrkar hnuaia project hnathawh reng rengte a hun taka an zawh theihna tura CM chairman-na hnuaia *Mizoram State Project Monitoring Committee* din a ni hi a thain, a lawmawm ka ti a. He Committee din a nih avang hian, contractor inthlahdah leh politician-te nena inhmelhriat that avanga duh duha hnathawh thin ho kha nasa takin a tibovin, a tih kian ka ring tlat a ni. Kan sawrkarin corruption a huatzia leh, nasa taka do a tum zia a tilang chiang hlein ka hria.

Tin, he sawrkar hian sawrkar hnathawh zingah aikal lak tam lutuk chungchangah hmate lo lain, a la mek zel a. Hemi chhunzawm nana sawkar hnathawh zawng zawngte a hun taka an hnathawhna hmun an thlena, a hun taka an ban theih nan te; tin, sawrkar hnathawkte’n hun an vawn theih nan leh hlawk zawka hna an thawh theih nan biometric system introduce a ni hi a lawmawm hle in ka hre bawk a. Nichin Question hour-ah kan CM zahawm takin, ‘he thil kan introduce avang hian hma kan sawn hle a ni’ tih pawh a sawi lang nghe nghe a ni.

Tuna kan sawrkarin thlai chi 4 lei nan a budget-a sum a dah mai bakah, kut-hnathawktute leh loneitute’n tun aia lei rem an rah zawkna atan *Agriculture Market Assurance Fund Management Board* din a ni te hi a lawmawm ka ti a. He Board hmalakna azara thlai thar an tharchhuahte a man tur mumal taka bithliah a ni a, a sawngbawlina tur leh State danga thawnchhuahna tura he Board-in a buaipui tur hi a lawmawm a, kut-hnathawktute tan a lawmawmin, a thlamuanthlak hlein ka hria.

Ruihhlo ngaite leh naupang humsual daite’n enkawlina tha an dawn theih nan leh sual laka ta an chhuah theihna atan NGO te nena hmalak dun tumna kan sawkarin a duang hi, a lawmawm ka ti a, hemiah hian a changtu Minister te hnenah pawh lawmthu ka

sawi a. Tin, hemi atana cheng nuai 50 lai mai budget-a dah a ni hi, ruihhlo dona leh social-evil dona atana theih tawp a chhuah zia a tilang chiang hlein ka hria.

Tin, ZPM sawrkar policy, 'Hand-holding - Bana kaih Policy, kan rama kuthnathawktute tihhmasawna tur policy he budget hmanga tih hlawhtlin a ni mai tur hi a lawmawm hlein ka hria a. He policy tihhlawhtlin a nihna atana kan sawrkarin '*Year of Consolidation*' a puang chung pawha crore 200 lai mai a dah hi, a lawmawm ka ti a. Kan sawrkar hian a policy-ah hian 'rilru leh thinlung tak tak a pe a ni' tih a lang chiang hlein ka hria. Mizoram mipui khawsak harsa zualte tan ruang phurhna atan budget-a crore 5 lai mai dah a ni hi a lawmawm ka ti a, keini thingtlang lam leh bial hla lam deuh tan chuan a lawmawm leh zualin ka hria a ni.

Tin, hemi atan a hma latu Social Welfare Deptt. changtu Minister, Pi Lalrinpuii hmalakna a ropuiin a fakawm hlein ka hria. Mi-harsa zawk leh thingtlang lam mite, a bikin chhungkuua sawrkar hnathawk awm lote tan healthcare bill atana crore 20 dah a ni hi a lawmawm hle a. He thil hian, kan sawrkarin mirethei leh pachhe zawkte a hmangaih zia a tilang chiang hle a. Kan Hon. CM (Finance Minister ni baw) hi mirethei, pachhiate-pa a nihzia a lang chiang hlein ka hria a, vawiinah hian a chungah lawmthu ka sawi duh baw a ni. Sawrkarin mirethei zawkte khawsak harsat zia hre chungah electric chhit man tihsan a tum lo mai ni lovin, eng chhit man tisang lova, power supply tihpun dan tur kawng zawn a lo tum a. Tin, power supply tihchangtlun nan crore 20.13 lai budget-a a dah hi a lawmawm hlein ka hria. Hei hian kan sawrkar hi *kalphungthar, mipui-sorkar* a nih zia a tilang chiang hlein ka hria.

Sawi ve lawk ka duh chu - Lawngtlai District hi power supply-ah hian kan hniamin, kan tha lo em em a. Pu Speaker, khawngaih takin, hun tlem min pek belh la ka lawm hle ang. (*Hon. Speaker: Minute khat i la nei e.*) Aw le, ka lawm e. Kan Power Minister hnenah pawh vawiinah hian bial aiawhin, min ngaihsak tur leh min duhsak turin khawngaihna ka han dil baw a ni.

Tin, kan sawrkarin tar chak lo leh upa zawkte hmakhua ngaia State sawrkarin - *Indira Gandhi National Old Age Pension Scheme* hnuai a tum ve tur ₹100 atanga ₹1000-a a tipung hi a lawmawm ka ti a. He kan sawrkar hian thalaite hmakhua - *youth policy* chauh ni lovin, upa zawkte hmakhua thlengin a ngaihtuh kim hle niin ka hria a, a lawmawm ka ti hle mai.

State Finance Commission pahnhna rawtna anga kan state's owned tax revenue atanga lak luh 42%, vertical devolution hmanga Autonomous District Council pathumte hnena pek tura ruahman hi ropui ka ti a. ADC area atanga thlantlin ka nihna angin vawiinah hian lawmthu ka a. Tin, ADC hnuai MDC-te salary bill, kan sorkarna reilote chhunga gazette a ni te hi vawiinah hian a lawmawm ka ti a, lawmthu ka sawi baw a ni.

Aw le, Pu Speaker, sawi tur ka la nei nual a; mahse hunin min daih si lova. Hun han pelh duai hi a tha ka ti lova. Eng pawh ni se, *Ministry on Road Transport & Highway* atanga Aizawl by-pass tunnel tur atana crore ₹1313.28 kan hmuh te, kawng chhia siamna atana ₹100,00,00,000 te, Road Fund Board hnuai atanga ₹40,00,00,000 kan han ruahman te hi a lawmawm ka ti a. Kan sawrkar hian kawng chhiaah pawh hian hma nasa taka lak a tum zia a lang chiang hle a ni.

Pu Speaker, budget-langtlang; mi-nawlpui hriatthiam theih tur budget huaisen tak; tar leh thalaite huap zo; kut-hnathawktute hmakhua ngai budget kan CM zahawm takin a pharh hi a tha ka tiin, ka lawm em em a, lungrual taka kan pass ngei pawh ka beisei a ni. Ka lawm e.

**HON. SPEAKER** : A lawmawm e. Dampa Bialtu, Member zahawm tak Pu Lalrintluanga Sailo ilo sawm ang.

**PU LALRINTLUANGA SAILO:** Pu Speaker, kumin kan budget 2024-25 chu kan Chief Minister zahawm tak, Finance Minister ni bawkin a rawn pharh hi, a thu hi a tha khawp mai a. Ka ngaihtuahnaah chuan, kan tlangval laia love letter thlum tak kan hmuh ang deuh hi a niin ka hria a; ‘*Thu chauh hian a tihlum thin a*’ tih Bible chang te kha vawiinah hian min ngaihtuah tir deuh hlek a.

A presentation hi a thain ka hria a. A thu han sawiah hian, he budget kan buatsaih laia kan ngaih pawimawh ber chu – ‘*Zoram mipuite tana ei leh bar zawnna kawnga tlo leh nghet zawk buatsaih*’ hi a ni a. Chu mi ti hlawhtling tur chuan, ‘langtlang leh rintlak taka sum leh pai enkawl hi kan ngaihpawimawh hmasak ber tur a ni’ tiin bul a han tan a; a thu hi a tha khawp mai a. Chuvang chuan, point 5-6 laiah hian kum danga budget-a kan la hmuh ngai chiah lohte han fak tlak a awm hlein ka hria a; chunte chu -

Pakhatnaah chuan, *Anti-corruption measures* chungchang hi, a lawmawm ka ti a. A takin a Board te pawh din chhovin chutiang chuan sawrkarin hma a lak mai bakah, CBI hnenah te hlemhletna chhui theihna tur *General Consent* a pe te pawh hi a lawmawm hlein ka hria a ni.

Tin, *punctuality - time management* chungchangah department zawng zawnga ‘biometric attendance system’ hman tur tih te hi a tha hlein ka hria a. Kan sawrkar hnathawkte hi a lehlamah an inthlahdah tawh a, hei hi a ram nu leh pa nihna zawnah kan House Leader-in a rawn vei hi a pawimawh hlein ka hria a, lawmthu ka sawi a.

Tin, khawsak harsa zualte tana a thlawna mitthi ruang thingtlang khaw lama ruang phurhna atana ₹5,00,00,000 a ruahman hi a lawmawm ka ti a. Hei hi MLA-te tan chuan phurrit min chhawk hawkna tur niin a lang a. Tun sawrkar din hnuah hian ka bialah mi pangnga ngawt an thi tawh a. A hminga a bialtu lo nih chuan, helaiah kan Social Welfare Minister zahawm takin a sawi zawk kha an lo hria a. Kan hah lohna tura hah tura, min

chhawk turin inthlahrung lo tak khan a rawn sawi tawh a. Amaherawhchu, a taka hman erawh chu a la ni chiah lo na chungin, a lawmawm ka ti hrim hrim a ni.

Tin, Pu Speaker, a dawt lehah chuan, transformer hman mek hlui tawh lutuk thlakthlengna tur atana crore ₹20.13 a rawn dah te hi a lawmawm hlein ka hria a. Keini thingtlang bial pheih khu chu a buaithlak khawp a, ruahpui-van-awn a lo surin, thli a lo tleh a, ngaw a tam si a. Khangin a vuak chhiat avanga transformer chhe tate kan ngah em em mai a. Hei hi a lawmawm hlein ka hria a.

A dawt lehah chuan, *Old Age Pension Scheme* hnuai a State contribution chu ₹100/- atanga ₹1000/- ngawta a han pung hi a lawmawm tak zetin ka hria a, lawmthu ka sawi mawlh mawlh duh a.

A dawt lehah chuan, PM-DevINE scheme atanga, a tawngkam ngeiah pawh hian, Pu Speaker, i rem tihnain thil han sawichhuah chakawm tak mai ka nei a. Tun hnai mai khan sorkar laipui hnuai a Ministry of Road Transport & Highway chuan Aizawl bypass tunnel siamna tur crore ₹1313.28 a rawn sanction hi a lawmawm hlein ka hria a. Pu Speaker, i ding lama mite khan he scheme hi kan CM hmasain a buatsaih lai khan nuizhat deuhah a nei a. Tunnel han siama, lei han verh te kha kan ti dawn lo anga han sawina te kha an tlangaupui deuh khan ka hria a. Amaherawhchu, kan House Leader-in lawmthu a han sawi te kha, a puitling hlein ka hria a. Hei hi kan ram ro hlu tak tak a ni.

Tin, thil ti thei lova inngaihna rilru te hi kan pah hret hret a thain ka hria a. Sairang lamah railway te a lo thleng chho mek a, khungah khuan tunnel ropui tak tak, vawiina 2.5 km ang chen dawn dawn te pawh verh a awm a, Mizo political leader te'n an vision an sawi kan nuiz tlat mai thin lai te hi, kei, ka lo ip deuh thin a ni. Chuvang chuan, hengah hian kan House Leader hi a puitling hlein ka hria a. A ma kutkawih chiah lo pawh, lang tlangin lawmthu a han sawi te hi a ropui ka ti a.

Chutih rual erawh chuan zawhna ang reng deuh, he budget-a hriatthiam loh tam tak ka neih rualin, keini mi-thiam kan ni lova. Amaherawhchu, kan han inzir ve chinah, members dangte pawh khan nikum lam budget kan en lo em maw ni chu aw ka ti a. Heta pheik 7-na, 24-naa 'Anti-Intoxicating Substance Drive' tihah te khan, ruihhlo dona chungchangah hma la ta viau leh, han tharthawh viau ang khan kan han sawi a. Nikum 2023-24 budget-ah khan sorkar hmasa khan ₹50,00,000 chiah a dah a; hei hi, a ngai chiah kha dah a ni mai a, thil ropui tak danglam a awm lova. Chutih rual chuan, page-14-na – 'Recovery of Loans & Advances' tihah te pawh crore ₹33.60 dah a ni a, nikum budget ang chiah, (danglam lovin) a ngai ang khan kan dah leh a ni mai a, han lawmna em em tur pawh ka hre lova.

Tin, ka hriatthiam loh laia chu - sawrkar chuan 'kumin chhung hian domestic electric bill tihsan kan tum rih lo' a ti a, hetah hian ngaihtuahna puitling tak kan neih a pawimawh hlein ka hria a. Kan ram chu, kan hmuh leh kan hriat angin underground leh



overground resources engmah kan nei lova, tax-a intungnung chho tura tih kan nih zia a lang reng mai a. Chutih lai chuan, tax mamawh a san zia te pawh kan hria a, State's Own Tax revenue chungchangah te pawh hmanni ah Stamp Act te pawh kan han tipung a, Vehicle Tax te kan han ti chho dawn a; nasa takin kum kal mek budget crore 184.30 atangin 21% a tihpun kan tum a ni a. Hei hi a budget speech-ah lang chiah lo mahsela, kawng hrang hrang atang chuan kan insawr-fu hle dawn a ni tih hi a hriat a. Chu ai chuan electric bill te pawh nakum maiah kan tisang leh mai ang a; nakum lamah a sanna pawh nasa tak anih leh hmel tho bawk a. Vawiih pawh tlem tlema lo tihsan chhoh pawh hi a tha zawk lawm ni aw tih te ka ngaihtuahnaah chuan a awm deuh a.

Tin, chutih rual chuan, kut-hnathawktute hmangaih deuh angin an lang a, 'Bana kaih Policy' te an ti a, chutah chuan, sawhthing chungchang te, aieng te, hmarcha leh hmunphiah te, hengah hian Minimum Support Price pek tum a nih chungchang te kan han hmu a. Amaherawhchu, sawrkar hmasa atangin crore 110 (nuai hlir nuai 11000/-) dah a ni chungin, vawiih kut-hnathawktute'n a hun taka an seng a, ruahtui tlak hmaa tih ral a hun tawh si laia sawrkar kan ngawi tlat mai bakah R.R. Associates te nena thu inhmuh tawh loh avanga kut-hnathawktute n an tuar tur hi hreawm ka tikhawp mai a, hei hi pawh ka ti tak zet a ni. Ka bial mite phei chu, khaw 10 ah khuan thil danga hma la miah lovin, sawrkar hmasa hun lai atang tawhin SEDP kal tlangin hmunphiah ah an ngaihtuahna zawng zawng an hmang a, hlawk pawh an hlawkpui a. Chungte hralhna nei lova awm ta khu, a lungchhiat thlak tak zetin ka hria a. Chuvang chuan, he lai hi tuna budget-a kan dah tawh, sawrkar hmasa sum hnutchhiah kaltlang khan 'tih dan zawng leh ni se' tih hi ka sawi duh a.

Chutih rual chuan, kan budget bu pumpui hi theih ang tawh tawkin ka han en ve a, thil ropui tak han hmuh em em tur chu lang lem lovin ka hria a. Chutah chuan mak deuh, zawhna ka nei erawh chu Pu Speaker, 2023-2034 budget-ah khan Capital Expenditure-ah hian 21.90%, hei hi Capital Expenditure kan tih chuan development hmalakna tur thil a ni a, mipui khawih tak zet; khatah khan 21.90% Ministry hmasa khan a dah a. Tunah hian Capital Expenditure-ah hian 17.03% chauh a dah ta hi lungchhiathlak ka ti a, heta tang hian development ropui tak kan khawih dawn loh zia a lang Chiang hle a; helai hi nakinah kan house leader-in a wind up hunah sawifiah se ka duh a.

Chutih rual chuan, Revenue Expenditure hi a sang em em mai a, Budget Estimate pumpui atang hian 82.97% kan han dah tawp a. Sawrkar hmasa khan nikum budget pumpuiah khan 78.10% chauh a dah a, helai increase nasa em em mai laia hi nakinah kan House Leader-in a wind up hunah min hrilhfiah se ka duh khawp mai. Chumi a nih loh chuan, 'kut-hnathawtu kan hmangaih' kan ti a, 'Thu chauh hian a ti thlum thin a ni' tih Bible-ah kan hmuh ang hian thil a kal ang tih ka hlau a. Capital Expenditure mipui hne tur development kan khawih a, 17.03% chauh kan nei chuan, bana kaih - eng ang policy pawh nei ila, kan inkai chhuah zawh loh ka hlau a ni.

Chuvang chuan, Pu Speaker, vawiinah hian Revenue Expenditure kan han tih - sawrkar mamawh leh a hlawh hrang hrang enkawlina tura percent sang ta em em mai te hi, engnge ni a chhan? Hei, kum khat lek a la ni a, a pawisa fai ang pawh hian vaibelchhe eng emaw zat a lo ni ta a, helai hi min hrilhfiah ka beisei tlat a ni. Kan budget pumpui hi han en han en hian, thil lang ngai reng reng lo point 4-5 a awm chuan lawmthu ka sawi duh a; a bak erawh hi chu thil danglam teh chiam a awm lutuk lova. I dinglama mi member-te pawh khan an han chhiara lawmthu an sawi mawlh mawlh te kha, ka sawi ang khan budget hmasa nen a inang reng a, pawisa chengkhat pawha tihpun loh, ruihhlo enkawlina chungchangah te pawh khan a ni mai a, han danglam vak kha a awm lo a ni. Policy pui bera an ngaih, hand-holding policy te pawh, Congress sawrkarah khan a taka lo lang chu, NLUP-ah kan hmu a, mipuiin an chhawr a ni. MNF Ministry-a SEDP-ah hetiang tho hian budget-ah reflect a ni a, tunah hian a kalphung tur pawh tarlan a la ni lova, a hming tur pawh phuah a la ni lova; a nihna takah chuan, sawrkar hmasaa an sawisel ang thin, Finance Minister-ah, a khawnpuiah crore 200 ngawt mai han dah laia kha, i dinglama member-te an intlawn siak leh liai leh dawn a ni (anmahni tawngkam tawh thin ang takin) tih ngaihndan erawh chu kan nei a ni (**Hon. Speaker:** Minute 3-in a pel tawh e;, zo thei dawn tawh em?) Pu Speaker, ka sawi zo tep tawh e. A tawp ber ka sawi duh chu, a tlangpui thuin, kan budget speech-a hi a tha a, a ngaihnaawm a. A chhungthu kan han sawi ah hian duhthawhna te tam tak a awm a, sawrkar hmasa hmalakna te tihpuitlinna lo lang chho zel te leh, thil lang ngai reng reng lo lawmthu sawi nan point 4-5 kan tarlan te nen chuan a tlangpui thuin heng kan budget te hi 'a tha thawkhat e' tiin ngaihndan kan siam a ni e. Ka duh tawk ang e. Ka lawm e.

**HON. SPEAKER** : Aw le, a tawk rih em ni? Naktuk sawina tur hun a la awm tho a, kan duhtawk rih a ni a ni ang e.

Aw le, sawi tur kan awm tawh rih loh chuan, vawiin atan kan business chu kan zo a; naktuk Ni 5<sup>th</sup> March, 2024 (Thawhlejni) chawhma dar 10:30 AM ah kan thukhawm leh dawn nia.

*Sitting is adjourned. (2:47 PM)*